

Edeni Ya Sitaane
Jeffersonville, Indiana USA
Okwamunaana 29, 1965

1 Ka twiname. Ruhanga Omukundwa, nitukusiima ekiro eki ahaw'omugisha ogu murungi munonga, kwija omurundi ogundi omu Iziina rya Mukama Yesu, kubugana omuzigu waitu, omuzigu Waawe, hanu omu kishaayi ky'orugamba; twine Ekigambo, kumubingira hare kuruga ahagati y'abantu Baawe; nikwo babaase kureeba, ekiro eki, Mukama, Omushana gw'Engiri. Ninshaba ngu nooza kushuka amajuta aha maisho gaitu n'omubazi gw'okuta omu maisho, nikwo gabaase kureeba Amazima; nikwo tubaase kuruga hanu, nitugamba omu mitima yaitu tuti, "Emitima yaitu tiyaashashaanuka obu Yaaba naagamba naitwe omu muhanda?" Tambira abarware n'abarikubonabonesibwa. Garuramu amaani abahweire amaani. Imustya emikono etaine maani eyaabaire rimwe enoganogokire. Ka tutegyereze Okwija kwa Mukama Yesu, oku turikwikiriza ngu kwiriire haihi. Nitukishaba omu Iziina rya Yesu. Amiina.

Mushutame.

2 Ninja kugyezaho kucwa bugufu ekiro eki, ahaw'okuba nimmanya ngu baingi barugire omu bicweka ebitari bimwe by'eihanga, ku . . . ahawwa saaviisi; nari bagumire hanu, bamwe omuriimwe, kandi nimuteekwa kugarukayo, nainga obundi ahaw'b'oburyo bw'okugarukayo. Kandi nimbasimma. Akasheeshe aka mbaire niinyenda kuhurira Ow'eishe-emwe Neville, nyowe nyenka. Muhuriire emirundi mingi, tihaine omurundi gwona ogu ndamuhuriire ntamusiime. Kwonka akasheeshe aka, obutumwa obwo oburi omu bwire, nimmanya ngu ntungire okwebemberwa kwa Mukama kubuhurikiza akasheeshe aka. Burungi munonga! Kandi nindeeba ahaw'enki bantu 'mwe mukunda kwija kumuhurikiza, nabwo. Kandi obutoosha naija kubagasira, nimpamya, kumuhurikiza.

3 Mbaire ningyezaho kurahutsyaho okwehanuuza kwangye kumwe eriizooba; akasheeshe aka n'eihangwe eri. Nkiineyo okwehanuuza kwingi, kwingi, kwingi kw'okugumizamu nakwo. Kandi ni . . .

Nk'oku, ndikwikiriza, ni Yesero owaagambiire Musa obwire bumwe, akagira ati, "Omurimo ogu nigukukira." N'ahaw'b'ekyo, twine ab'eishe-emwe baingi hanu ahaw'enshonga zaanyu. Buri emwe omurizo ebaire ehikire, kandi n'ebintu birungi ebirikuteekwa kuteebwaho omutima. Kandi mugume mwije aha muriisa waitu, nari Ow'eishe-emwe Mann, n'abaheereza abandi ab'Okwikiriza kwaitu hanu. Nimubaasa kubahikaho. Nibaza kubagambira kurungi buzima ekintu ky'okukora; abantu abandi, abaana baabo; nibashwererana, nari ebintu ebigwire. Kandi abantu aba nibabaasa kubahwera omu muringo gumwe nk'o-nk'ondiijo weena, 'habw'okuba n'abaheereza ba Kristo. Mbwenu mubahikyeho, kandi nimpamya nibaza-nibaza kubaha obuhwezi obu murikwetenga. Tindikubaasa kubahikaho boona. Ni baingi munonga, hoona hoona ahu orikuza. Nibagumizamu kweyongyera munonga munonga, nooreeba. Kandi nooyenda kuhika ahari buri omwe aharibo, baitu torikubaasa kukikora. Kwonka nshaba obutoosha ngu Ruhanga, omu muringo nanka, naaza kubibakorera kurungi byona.

4 Hati, ekiro eki, nitwenda kuza omu Byahandiikirwe, kandi tushome ekicweka ky'Ebyahandiikirwe kuruga omu kitabo ky'Okutandika, eshuura ya 3; reero tugarukye enyima kakye aha bintu bimwe ebi tubaire nitugambaho, omu bwire obuhingwire, reero tureebe ku Mukama Yesu araatwongyereho bikye ebi turaamanye ku turaashohore. Ni-ninshaba ngu Akikore.

Kandi njoka ekaba eri enyabwengye okukira enyamaishwa zonna ezi Mukama Ruhanga yaahangire. Yaabuuza omukazi eti: N'eky'amazima, Ruhanga akagira ngu mutarirya aha muti gwona ogw'omuri eki kibanja?

Omukazi yaagarukamu njoka ati: Nitwikirizibwa kurya ebijuma by'emiti y'omu kibanja,

Kureka ebijuma by'omuti oguri ahagati y'ekibanja; nibyo Ruhanga yaagizire ati: Mutaribirya, n'obu kwakuba okubikoraho, mutakaafa.

Enjoka yaagambira omukazi eti: Okufa kwo, buzima timurifa;

Ahabw'okuba Ruhanga naamanya ngu eizooba eri muriguryaho, amaisho gaanyu garyaignka, naimwe mube nka Ruhanga, mumanye oburungi n'obubi.

Omukazi ku yaareebire omuti guri murungi kurya, niguschemeza amaisho, kandi nigwetengwa ahaw'b'okuha omuntu obwengye, yaacwa aha bijuma byagwo, yaarya, yaahaho na iba, nawe yaarya.

Ahonaaho amaisho gaabo bombi gaiguka, baamanya ku bajwaire busha, baayebazziirira amababi g'omutiini g'okwekingaho.

5 Mukama ayongyere emi . . . emigisha Ye aha kushomwa kw'Ekigambo Kye. Hati niinyenda kutwara eishomo ekiro eki, okuruga omuri ekkyo, reero ndyete: Edeni Ya Sitaane. Ekintu kikye kibi munonga ky'okugamba, Edeni Ya Sitaane. Nikyenda kushushana, n'ekiro kya Sande eri, niinyikiriza, obu naabaire nimbagambira hanu ahari Akagyegyena k'Omuntu Orikuteekateeka, n'eky'omuntu orikwera arikukunda.

Kandi obumwe n'obumwe ebigambo bikye bibi ebi bituhitsya aha kintu nanka; bituhitsya aha kwega, kandi bituma waashoma Ekigambo. Kandi ekkyo nikyo ndikwenda abashomi bangye kukora. "Omuntu tatungwa

by'okurya byonka, kureka n'Ekigambo kyona ekiruga omu kanwa ka Ruhanga." N'ahabw'ekyo, shoma Ekigambo; Kyegye. Kandi Okyegye n'amaisho ga Ruhanga, kuha obwengye bwawe okwetegyereza oku tushemereire kutuura omu biro ebi.

6 Hati okwija, ekiro eki, okugamba naimwe kwonka, kugira ngu, "Mpaho, nimbaasa kukora eki nari kiriya, . . ."

Nkaayenzire kugamba n'abantu, nk'oku naakwenzire nangwa n'okutaaha omuka na buri omwe omuriimwe ekiro eki. Ni . . . Ruhanga naamanya ekyo ku n'amazima. Nkaayenzire kuza omuka na buri omwe omuriimwe, n'o-n'okurya-kurya kyantsya naimwe omu kasheeshe, n'o-n'o-n'okuz kaamugye naimwe nyencakare omu ihangwe, mwareeba. Ekyo nkaayenzire kukikora, kwonka ti-tindikubaasa kukikora. Kandi nkaayenzire kuza omuka reero nkashutama kwonka nkagaaniira naimwe; kushutama omu ibaraaza ahanyima ya saaviisi, reero nkagamba naimwe akaanya kakye, nkagaaniira naimwe aha bikwatiraine n'okubaho kwanyu n'aha bikwatiraine na Ruhanga. Ekyo nkaayenzire kukikora. Abashaija n'abakazi hanu; Ruhanga naamanya ngu ekyo nkaayenzire kukikora, kwonka tindikubaasa kukikora. Mwareeba, hariho nk'oku-nk'okukurura kandi n'oburuhe.

7 Kandi-kandi omu busingye obu obw'okwemereza omutima obu tutwiremu . . . Kandi naanye, ndi omuntu orikwemereza omutima. Eriizooba nincwamu ekintu nti, "Ninteekwa kukikora," reero nyencakare kimba hare mahiro miriyoni; ekintu nanka kiba kyakiremeise kandi kikora eki na kiri. Reero ogira obwire bugumire, noogyezaho kuta obwengye bwawe omu buteeka.

8 Kwonka obusinguzi bwangye bukur n'okubuurira Engiri omu Kanisa, n'okukora eki ndikubaasa kyona kureetera Yesu Kristo ekitiniisa omu biro ebi, obwo nkiri hanu omu nsi, n'obwire obu ntsigaize omu nsi. Naija kugyezaho kubagambira ekintu ekiraabahwere; ekintu nanka. Naakishomaho naaheza kutaaha omuka akasheeshe aka. "Ngambe ki ekiro eki, Mukama, ekiraahwere abantu abo?"

Mpurikiize obutumwa obwo bw'amaani akasheeshe aka obu . . . Ow'eishe-emwe Neville yaatureeteire, ahari . . . Nteekateekire ngu bubaire obw'okutangaaza munonga, oku agambire aho, ati, "Dokita naashwijuma oburware; kwonka omuntu orikwija aine tureeyi ejewire empitirizo, niwe ateera ekikato." N'ahabw'ekyo nteekateekire ngu ekyo buzima kibaire e-ekigambo kikye kirungi. Naateekateeka ahari ekyo, "omubazi gw'ekikato, endwara yaamara kushwijumwa." N'ahabw'ekyo ekyo n'ekintu kirungi.

9 Naaba niinyenda kugamba naimwe ekintu, kureeta ekintu ky'okubakyengyesa okuraganisa kwa Ruhanga okw'obusingye obu. Mwareeba? Ekintu, kitari kintu eki omuntu ondiijo yaabaire arimu ekiro ekyahweire, kureka ekintu . . . kandi ku . . . Ebintu ebyo ni birungi; twena tujuriza ebintu ebyo. Kwonka naateekateekire ngu ninza kugyezaho kureeta ekintu omu biteekateeko byanyu, n'Ebyahandiikirwe ebi ebi mpandiikire hanu, ebiraabakyengyese, kumanya, kubahindura abaserukare barungi omu mwanya ogu murikurwaniram hati; kwega obukoryo bw'omuzigu, kugira ngu mubaase kutanga byona bitakahikireho, mwareeba. Ekyo nikyo kintu kikuru, n'okwega kwekingira-entomi okutakuhikaho, oku orikubaasa kwona.

10 Hati, reka tureebe hati hari eki kikuru . . . ahabw'edakiika nkye, ebiro bibi ebi bikuru ebi tutwiremu hati. Tindikwikiriza ngu haarabaireho eizooba eri ndashomireho omu byafaayo . . . Habaireho ebiro bikuru by'okuhiigwa, obu abaana ba Ruhanga baitwa embaju zonna. Kwonka kureeba okubeihabeisha kw'omuzigu, titukatungahoga ebiro nk'ebi ebi tutwiremu hati. Nibyo biro ebirikukirirayo kimwe kuba eby'obwengye, n'oburyarya. Kandi ku ndikureeba ekyo, kireeta eki, ngu, Omukristaayo naateekwa kwegyendesereza munonga eriizooba okukira oku arabaire omu busingye obundi bwona.

11 Hati, enyima okwo omu biro by'okuhiigwa, kwa Roma, aha Kanisa; Omukristayo kukora enshobi, akaba agyenda omu irorero agaburirwa entare, nari ekintu ekindi nk'ekyo, ku baabaire bamushanga ngu n'Omukristaayo ahabw'obujurizi bwe. Kwonka omwoyo gwe gukaba gujunwa, ahabw'okuba akaba buzima, ari omwikiriza kashushu omuri Ruhanga, kandi akoma n'akamanyiso obujurizi bwe n'eshagama ye ashemereirwe. Emitsi ye ku yaabaire neejwa, nari ebihuru omu mubiri gwe, n'eshagama erikujwa, akaba agambira ahaiguru, n'okwikiriza kw'amazima, agira ati, "Yaakiira omwoyo gwangye, Mukama Yesu!"

12 Kwonka, hati, obwengye bwa sitaane hati, butuma abantu baikiriza ngu n'Abakristaayo kunu batari bo. Nkikyo aho. Torikwetenga kuta akamanyiso . . . N'e-n'ekiro ky'obwengye bwingi munonga okukira oku kyakubaire, okukira obu waabaire nooteekwa kukoma n'akamanyiso amagara gaawe-gaawe n'obujurizi bwawe. Sitaane etegire buri mutego gw'obugoby ayaakubaasa, ku . . . We n'omubeihi. Kandi Yesu akatugambira, omuri Matayo 24, oku ebiro ebi biriba ebi tutwiremu, ebiro ebirikukirirayo kimwe kuba ebirikuhabisa ebirabaireho, "haihi kushushanira kimwe kugira ngu bibone kuhabisa n'Entoore zonyini za Ruhanga kyaba nikimubaasikira kuzihabisa."

13 Hati reka tugyeragyeranise Ebyahandiikirwe bimwe, nari obunabi obwagambirwe omuri Baiburi, ahabw'ebiro ebi, tubugyeragyeranise n'ebiro ebi tutwiremu hati.

Omukristayo kya Timoseo ya Kabiri 3, nitwega eki, ngu nabi akagira, ngu, "Kiryabaho omu biro ebi, ngu abantu baryaba engangaazi, abarikwekuza, abarikukunda kweschemeza bonka okukira Ruhanga." Gyeragyeranise ekyo hati, ahabw'akaanya kakye. Titurikuza . . . Nituza kukigambo mu bugufu, ahabw'okuba titwine obwire bwingi obw'okukirabamu kyona nk'oku tushemereire kukiyetegyereza kurungi; okwihaa okukyoreka kwonka,

kugira ngu mubaase kwetegyereza mwahika omu ka reero mukishome. "Engangaazi, abarikwekuza, abarikukunda kweshemeza bonka okukira Ruhanga; abatarikwenda kugarukana n'abandi, abarikubeihererana, abatarikweyangisa, kandi abarikugaya abantu barungi." "Hati Omwoyo akagamba butunu ngu ebintu ebi biryabaho omu biro by'aha mperu." Ebyo n'ebiro ebi, obunabi nibubigambaho.

14 Hati nitushoma, nabwo, omu kitabo ky'Okushuururwa . . . 14, Okushuururwa 3:14, nimmanyisa, Obusingye bw'Ekanisa ya Laodikea, oku ekanisa eriba omu busingye obu obw'aha muheru. Kandi eryaba, Nihagira hati, "Neeza kushutama nk'omufaakazi kandi eteine ki ekyenire. Ekaba-ekaba eri engaiga, eine obutungi bwingi, kwonka etarikumanya ngu n'abooro, enshoberwa, empumi, kandi bajwaire busha, kandi batarikukimanya." Hati, ijuka, Naagambira ekanisa y'obusingye obu, "enshoberwa, empumi, ejwaire busha, kandi etarikukimanya." Ekyo kicweka ky'aha muheru, ekyo Kigambo ky'aha muheru, nikyo kirikutuma kyatangaza munonga. Nibateekateeka ngu baijwire kurungi Omwoyo, boona beetegwire. Obusingye bw'Ekanisa ya Laodikea n'Obusingye bw'Ekanisa y'Abapentekoote, 'habw'okuba n'obusingye bw'ekanisa y'aha muheru. Luteeri akaba aine obutumwa bwe; Wesili akaba aine obutumwa bwe; n'Abapentekoote bakaba baine obutumwa bwabo.

15 Nabwo, Kikagamba, ngu, "Ahabw'okuba kooyakoooya, otarikwosya nari otarikufuka," okukyamukirira kw'aheeru, okukyenga Engiri omu bwengye bw'obuntu; "ahabw'okuba," Akagira ati, "nikwo ori, Niinyija kukutanaka." Omu bigambo ebindi, kikatuma yaayenda kutanaka kureeba ekanisa omuri egoy mbeera.

16 Kandi, mwijukye, Bakamutanaka; kandi Akaba ari aheeru y'ekanisa, naagyezaho kugaruka omunda, omu busingye obwo bubi bw'Ekanisa ya Laodikea.

17 Ruhanga w'ensi egi eriizooba, omuntu ou ensi egi erikuramya ebi, ni Sitaane. Kandi abantu tibarikukimanya ngu nibaramya Sitaane, kwonka ni Sitaane orikwehindura we wenka nk'ekanisa, mwareeba, nk'ekanisa. Nibaramya Sitaane, barikuteekateeka ngu nibaramya Ruhanga kurabira omu kanisa, kwonka nigwo muringo Sitaane akikoziremu.

"Oo," noogira oti, "kwonka rindaho kakye; nitubuirira Ekigambo."

Reeba enyima hanu aha ishomo ryangye, ekiro eki. Sitaane niwe yaabuuriire Haawa Ekigambo, okubanza, "Ruhanga akagira," mwareeba.

N'okwo kukyenga kubi ekicweka ekyo ky'Ebyahandiikirwe ekirikukwata aha kiro ekyo. Naija kukureka omanye ngu byona ebi Yesu yaakozire bikaba bihikiire kimwe. Naija kukureka omanye ngu byona ebi Musa yaakozire bikaba bihikiire kimwe. Kwonka waakwata okuraganisa oku baahaire abw'ebiro ebi, obwo Okwo kukaba nikukwata aha busingye obundi. Ekyo nikyo kyonka eki arikuteekwa kukora, mwareeba, n'okuhitsya abantu aha Kukiikiriza omu muringo ogwo, kandi ekyo-ekyo nikyo ekyo kyonka. Ahakuba, "Torikubaasa Kukicwaho Ekigambo kimwe, nari Kukyongyeraho ekigambo kimwe." Kwonka ekyo nikyo akora.

18 Abantu, nibaramya Sitaane batarikukimanya, nibateekateeka ngu nibaramya Ruhanga; nk'oku turikuraburwa n'obunabi, omu kitabo ky'Abatesalonika ba Kabiri. Ekyo, reka tukishome, Abatesalonika ba Kabiri, eshuura ya 2. Reka tukireebe akaanya kakye, ku ndaabaa, ahonaaho. Niinyenda kukishoma. Kwonka, niinyikiriza, Abatesalonika ba Kabiri. Nyine Ekyahandiikirwe hanu. Omu ya Kabiri . . .

Ebirikukwata aha by'okwija kwa Mukama waitu Yesu . . . n'okuteerana kwaitu okumubugana, nitubeeshengereza, B'eishe-emwe,

Hati, reeba, "okwija kwa Mukama, n'okweteeranira Ahariwe," nk'oku Ruhanga ariteeranira abantu Be Ahariwe omu biro by'aha muheru. "Okweteerana kw'abantu ahari Mukama," kutari aha kanisa, "ahari Mukama; okweteeranira hamwe Ahariwe."

Mutarahuka kuhahaaza emitima yaanyu mukabura obwengye, nari . . . mutajagarazibwa-mutajagarazibwa yaaba mwoyo nari . . . ekigambo nari ebaruha, ei barikugira ngu ekahandiikwa itwe, . . . ekiro kya Mukama kiiriire haihi.

Hatagira omuntu owaababeihabeisha omu muringo gwona; ahakuba ekiro ekyo tikirija, hatakabandize kubaho okutaana na Ruhanga, omuntu ogwo omugomi ("omuntu ogwo omugomi," reeba eki ari hati), omuntu ogwo omugomi akashuururwa, niwe mwana w'okuhwerekyerera, (ogwo akaba ari Yuda, mwareeba);

Kandi omuzigu oyetunguura, akarwanisa ekintu kyona ekyetwa Ruhanga nari ekiramibwa, akashutama omuri hekalu ya Ruhanga, naayeyeta Ruhanga.

19 Okwo okubeihabeisha kw'Ekanisa y'ebiro ebi! Mwareeba, "omwana w'okuhwerekyerera," sitaane. "Omwana w'okuhwerekyerera," sitaane. N'ahabw'ekyo, abantu nibaramya Sitaane omu biro ebi, nibateekateeka ngu nibaramya Ruhanga. Kwonka nibaramya sitaane kurabira omu nyikiriza y'ediini, ebigombe by'amadiini ebigunzirwe abantu n'eniyikiriza z'amadiini ebihikiize kimwe abantu aha kubehwabeihwa kw'amaani munonga oku ensi eramanyire. N'obu Ekigambo kya Ruhanga ekyaraganisiibwe habw'ebiro ebi, kiraabuuirwe okwingana ki, kandi kikahamibwa, nabwo tibarikwija Kukiikiriza. Tibarikiikiriza.

Mbwenu ahabw'enki? Nitwebuuza ahabw'enki. Ahabw'enki kitari; ahabw'enki batarikwija Kukiikiriza? Kunu

Ruhanga yaagizire ngu Akaba naaza kukora ekintu nanka, kandi Akakikora, kwonka nabwo bakakiteera amabega haza bakakirugaho. Nk'oku Haawa yaabaire naamanya ngu eki Ruhanga yaagambire, Ruhanga akaba naaza kukikora; kwonka akakiteera amabega, kuhrurkiza ebi sitaane yaabaire naaza kugamba.

Mwijukye, omu busingye obundi, kitwire kiri ekintu nikyo kimwe. Omuri buri busingye, kitwire burijo kiri ngu Sitaane agyezaho kucurika Ekigambo ekyo aharibo, naabareetera kureeba obusingye obundi.

20 Reeba, obu Yesu yaija, mwareeba, Sitaane akaba ari omuri ekyo kibiina ky'abeegyesa b'Abayudaaya, na baarabi, n'abanyamurwa, naagyezaho kubagambira kurinda ebiragiro bya Musa, obwo Ekigambo kyonyini kyagambire ngu omu biro ebyo Omwana w'omuntu aryashuururuwa, mwareeba, ngu Aryayeshuururuwa We wenka. N'ahabw'ekyo bakaba nibagyezaho, kubagumya bari abanyadiini, n'omu biragiro bya Musa. Reeba eki yaakozire? Akaba naagyezaho kubagambira ngu, "Ekyo kicweka ky'Ekigambo buzima kihikire, kwonka Omushaija ogu tiwe Muntu ogwo." Mwareeba oku ari omubeihi? Ekyo nikyo kiro kyonyini ky'okubeihwabeihwa.

21 Kitwire kityo, na hati nikwo kiri, Sitaane naahamya obukama bwe omu nsi. Egyo niyo nshonga buzima ahabw'enki arikukikora, ahakuba naayenda kuhamya obukama bwe wenka.

Nk'omushuubuzi, otari Mukristaayo, naaza kukora buri bukoryo bwona obu arikubaasa kutuma waareeba ekintu omu muringo ogugwire. Ku araabe aine e-ekigyendererwa n'eki arikugobamu nk'omuntu omu kutuma waakora ekyo, kutuma waakireeba omu muringo ogwo, naaza kukworeka byona ebi arikubaasa, kandi akuzibire kureeba amazima gaakyo, ahabw'okuba naayeyendeza we wenka. N'obu yaakubeiha kandi akaryarya ata, hamwe n'ebindi, aine eki arikugoba nk'omuntu.

22 Niyo nshonga ahabw'enki Sitaane akozire eki. Akozire kurabira omu buheereza kukikora, nk'oku Ruhanga yaaraganiise ngu aryakora. Hati, akatandika n'okuhabisa kw'obunyadiini omuri Edeni, kandi yaagumizamu kwiha obwo.

Kutari kutaho ekibiina ky'abakomyunisiti. Abakomyunisiti tibaine kakwate n'eki. N'ekanisa, aho niho orikuteekwa kwetegyereza, mwareeba. Tibari-tibari bakomyunisiti abaabaire nibaza kuhabisa n'Entoore zonyini. N'ekanisa erikwija kuhabisa n'Entoore zonyini, mwareeba. Tibari bakomyunisiti; nitumanya ngu nibahakanisa Ruhanga, kandi ni ba antikristo, buzima ni ba antikristo, buzima nibo, omu mitwarize, kwonka tibari antikristo ori. Antikristo ogwo n'omunyadiini, omunyadiini munonga, kandi naabaasa kujuriza Ebyahandiikirwe, kandi atume Byayetegyerezibwa kurungi.

Nk'oku Sitaane yaakozire okwo enyima omu kutandika, akajuriza buri kimwe yaamarayo ati, "Ruhanga agambire ngu, 'mutarirya aha muti gwona ogw'omuri eki kibanja.'" Mwareeba, Yaakijuriza kubi.

Yaagira ati, "Eego, nitwikirizibwa kurya aha miti yoona y'omu kibanja, kwonka hariho omuti ahagati y'ekibanja ogu Ruhanga yaagambire ngu tutarya, ahakuba, nangwa n'okugukoraho tutarigukoraho; 'habw'okuba, ekiro eki turikikora, ekiro ekyo turyafa."

23 Yaagira ati, "Oo, buzima okufa kwo timurifa. Kwonka reka mbahe enshonga ahabw'enki Ruhanga yaagambire eki, n'ahabw'okuba . . ." Mwareeba, hati akakora ki? Akajuriza Amazima aga, mwareeba. Akagira ati, "Niguza kwigura amaisho gaanyu, kandi niguza kutuma mwamanya ekirungu n'ekibi. Nimuza kuba nka Ruhanga obwo, ku muraakikore."

Ekyo kyonka nikyo arikwenda kukora, kandi ekyo kyonka nikyo kintu kimwe eki arikugyezaho kukora eriizooba. Hatwireho okuhabisa kw'obunyadiini kwiha omu kutandika kwonyini omuri Edeni, kandi nikwo kitwire okwiha obwo. Omu bwire bwa Adamu, kukaba kuri okubehwabeihwa. Omu bwire bwa Noa, kukaba kuri okubehwabeihwa. Omu bwire bwa Yesu, nikyo kimwe. Kandi na hati nikyo kimwe, omuringo nigwo gumwe, okubeihabeicha kw'obunyadiini!

24 Hati, nituza kureeba ensi, obu Ruhanga yaabaire naagitegyeka. Hati, obu Ruhanga yaabaire naategyeka . . . yaabaire agiine ahansi y'obutegyekyi Bwe. Reero Sitaane ku yaagitwaire, ahabw'okwanga Ekigambo kya Ruhanga. Ruhanga rimwe akaba aine ensi ahansi y'obutegyekyi Bwe. Akagita omu muhanda gwayo omu kaabunga. Yaagitamu, yaatuma yaakora. Yaakora buri kimwe, eri omu butegyekyi Bwe. Hati nituza kugyeragyeranisa ekyo na bwanyima ya Sitaane kugita omu butegyekyi bwe.

25 Hati, kikatwarira Ruhanga emyaka enkumi mukaaga. Tikiramutwariire obwire obwo bwona, beitu Akatwara obwire obwo bwona. Emyaka enkumi mukaaga, ahabw'okuba nitwegyesibwa ngu "ekiro kimwe omu Iguru n'emyaka rukumi omu nsi," kandi ekaba eri emyaka enkumi mukaaga, nari ebiro mukaaga ebi Ruhanga yaahangiiremu ensi. Hati, kikatwarira Ruhanga emyaka enkumi mukaaga kugihamya, kugibyaramu embibo nungi n'okuzaara buri kintu omu muringo gwakyo. Buri kintu nikiteekwa kuzaara omu muringo gwakyo. Embibo Ze zoona zikaba ziri nungi, n'ahabw'ekyo niziteekwa kuzaara omu muringo gwazo. Ruhanga akatwara emyaka enkumi mukaaga.

26 Aha muheru, ku Yaagikozire yoona, kandi aha muheru ni . . . aha muheru yaabaho n'entebe yaayo nkuru, y'ensi, omu mwanya murungi oguri oburugwa-eizooba bwa Edeni, ogurikwetwa ekibanja kya Edeni. Ruhanga akakora entebe nkuru y'ensi omu kibanja kya Edeni, omuri Misri, aha muheru gw'oburugwa-izooba bw'ekibanja

niho entebe nkuru yaabaire eri.

27 Kandi ahaiguru ya byona, Akataho omwana We n'omukazi w'omwana We, kutegyeka byona. Ekyo kihikire. Ekyo nikyo Ruhanga yaakozire. Akabaha obushoboorozi bwona bw'okutegyeka. Bakaba nibabaasa kugambira omuyaga, nagwo gureka kuhuuha. Bakaba nibabaasa kugambira omuti, nagwo gutsinduka guruga hanu guza hari.

Entare n'omushega bikaba birya hamwe, kandi omwana gw'entaama gubyama nabyo. Hakaba hatariho kibi. Bukaba buri obusingye obuhikiriire, okukwatanisa okuhikiriire, buri kimwe omu kuhikiirira, kandi obu Ruhanga yaabaire naagitegyeka. Kandi yetegyereze, Akaba aine eye . . . Akaba aine ensi Ye, byona bikaba nibikora. Byona bikaba nibigyenda gye. Buri kintu nikirya ebimera; hatariho ekirikuwa, hatariho ekirikucwekyerezibwa, hatariho ekirikusiisikara. Hatariho . . . Kukaba kuri okuhikiirira kwonka.

Kandi ahaiguru yaabyo byona, Akataho abaana Be abakundwa, mutabani We na muhara We, omushaija n'omukazi we, kugitegyeka.

28 Ruhanga akamarwa munonga! "Yaahuumura emirimo Ye yoona, aha kiro kya mushanju," reero yaayeza ekiro kya mushanju kuba sabato Ye.

Ahabw'okuba, Ruhanga akagireeba yoona, bwanyima y'okumara emyaka enkumi mukaaga naagibumba n'okugita omu buteeka, kutuma yaabaho; n'okutaho emishozi, n'okutuma omuriro ogurikuruga omu itaka gwatsindika emishozi ahaiguru, n'ebantu ebyabaireho omu kubaruka okwo; akabyomya, yaagikora omu muringo ogu Yaabaire naayenda. Kandi gwaba omwanya murungi.

29 Hakaba hatariho ekintu ekirikushushana nayo, paradiiso nkuru ya Ruhanga! N'ebinyamaishwa eby'amaani rutaaba ebya ira, n'ebindi byona, nibyekurura nibigygendagyendamu, n'enyamaishwa z'amaani; zitarikukora kubi. Bikaba nabitwaza gye nk'akaana k'enjangu. Bikaba bitaine ekintu kyona na kakye; hatariho-hatariho burware, hatariho maganya; hatariho kakooko na kamwe akarikureeta oburware omu nsi. Oo. Ka n'omwanya!

Enyonyi z'amaani nizeehuuba niziruga omu muti niziza omu gundi, kandi Adamu akaba naabaasa kuzeeta omu maziina, kandi zigurukira aha mabega ge kandi-kandi zimweshongorera. Reero, oo ka n'omwanya murungi ogu Ruhanga yaabaire aine!

30 Reero yaakora kimwe aha byabaire Bimurimu kuruga omu mubiri Gwe. Ruhanga aine ebimurimu omu Mubiri Gwe.

Nk'oku, ori ekirugire omuri sho. Kandi, yetegyereze, okaba ori omuri shwenkuru wa shwenkuru wa shwenkuru. Kwonka, omuri ekyo, tugambe, nituza kukishushanisa nkaiwe na sho. Hati, okaba otaine ki orikumanya obu waabaire ori omuri sho. Ensigo y'amagara eruga omu kishaija. Ekishaija kiine akatafaari k'eshagama; omukazi aine e-eihuri; hati, n'ahabw'ekyo akatafaari k'eshagama kaine amagara omuriko. Reero, obwo, obu waabaire ori omuri sho, buzima okaba otaine ki orikukimanyaho. Kwonka, nabwo, sayansa n'Ekigambo kya Ruhanga bihamya ku waabaire ori omuri sho, kwonka okaba otaine ki orikukimanyaho.

Kwonka sho akagira ekihika ky'okukumanya. Kandi omu kuteerana kw'okubugana n'omukazi omuzaire, reero sho yaakumanya. Hati, ori ekirugire omuri sho. Nooshushana nawe, kandi oine ebicweka by'omubiri gwawe ebirikushushana n'ebya sho.

Hati, okwo nikwo Ruhanga yaabaire ari omu kutandika. Buri mwana wa Ruhanga na buri muhara wa Ruhanga akaba ari omuri Ruhanga omu kutandika. Torikukijuka hati, kwonka okaba oriyo. Akaba naakimanya. Kandi Akaba naayenda ngu obevo nikwo Abaase kukoragana naiwe, kugamba naiwe n'okukukunda, n'okukukwata omu ngaro.

31 Torikwenda mutabani waawe . . . T'ekiro kikuru obu mutabani waawe yaakubaasa kutaaha omuka akashutama aha meeza? Ku arikugaruka naaruga aha rugamba, nari ekindi kintu, n'enkojo; oku orikumutebeekanisiza kyakiro; noita enyana y'ebishajju, n'ebindi, omutebeekanisiza! N'omubiri gwawe gwonyini n'eshagama, kandi akaba ari omuriwe. Okaba otarikumumanya obwo, kwonka okaba noomanya ngu ariyo.

32 N'ahabw'ekyo Ruhanga akamanya ngu turyaba turi hanu, kwonka Yaatuta omu mubiri kugira ngu tubaase kukwatwaho. Okugira ngu Abaase kutukwataho, Akashushana naitwe obu Yaahinduka Yesu Kristo, Omwana wa Ruhanga We wenka, obwijwire bw'okworekwa kwa Ruhanga. N'ahabw'ekyo ekyo kikaba kiri ekigyendererwa kya Ruhanga, okworeka ebimurimu Bye omu kukwatanisa.

Obu naabaire ndi omuri tata, nkaba ntaine eki ndikukimanyaho. Kwonka ku naabaire omwana we kandi akanzaara, nkaba ndi ekirimu, ekicweka kya tata. Naiwe ori ekicweka kya sho.

Kandi nk'abaana ba Ruhanga, turi ekicweka ky'ebiyabaire Bimurimu, twaba abantu nk'oku Yaabaire omuntu, kugira ngu tubaase kukwatanisa omwe na mugyenzi we, nk'eka ya Ruhanga omu nsi. Kandi ekyo nikyo kyabaire kiri ekigyendererwa kya Ruhanga omu kutandika. Eego, sebo. Ekyo nikyo Ruhanga yaabaire naayenda omu kutandika.

Akaba naategyeka byona. Reero yaata omuntu omu kibanja kya Edeni, aha bugabe bw'okwecweramu; yaagira

ati, "Mwana wangye, n'eyaawe.

33 Ka n'omwanya murungi! Ruhanga akamarirwa kimwe, okuhitsya obu Yaagyenzire kandi akahuumura emirimo Ye yoona. Buri muti tiguraanire amahwa n'amatojo. Tihariho bijuma ebyarugire aha muti gw'amahwa. Buri kintu kikaba kihikiriire. Embibo zoona zikaba zihikiriire. Buri kintu kikaba kiri omu mbeera ehikiriire.

Bwanyima ku Yaagiire kuhuumuraho kakye, omuzigu We yaashensheramu n'oburyarya, yaagukwata, ahabw'okushoborora kubi puroguramu Ye aha baana Be. Kunu, Yaayesigire omwana We; nk'oku oyesiga muhara waawe yaagyenda n'omushaija nyekiro; waayesiga mutabani waawe kyaba nikimwetaagisa kugyenda n'omwojo orikunywa amaarwa nari omwojo orikureetsa. Mwareeba, Akeesiga omwana We, ku atarikuza kukora ekintu kyona ekibi, kandi ku yaabaire naaza kurinda buri Kigambo eki Yaagambire. Kwonka omuzigu akashensheramu; nk'omunyabwengye ogwo ojwaire gye engobya orikubaasa kutwara muhara waawe kandi akeetwaza kubi; nari-nari omukazi orikubaasa kutwara, orikuza aheeru na mutabani waawe akakora ekintu nikyo kimwe. Mwareeba, akashensheramu. Omuzigu wa Ruhanga akashensheramu kandi yaashoboororera kubi Haawa Ekigambo.

34 Hati, we, ahabw'okugwa oku, sitaane akwatsire kandi yaakubuura ekibanja kya Edeni, we wenka. Akakikwata. Kandi hati atungire emyaka enkumi mukaaga y'obutegyeki oburikuhabisa; naabeihabeihabisa abantu, abaana ba Ruhanga, nk'oku yaakozire buriya. Ahabw'okuba, bakaba bateirwe aha bugabe bw'okwecweramu, kukora oku baabaire nibenda. N'okwikiriza ngu nibaza kukora ekihikire, nari okwesiga ngu nibaza kukora ekihikire, mbwenu bakaija neekikorwa kibi, baaguza obukuru bwabo nk'oku Esau yaakozire, ahabw'ensi. Sitaane akagisingura, kandi yaagitwara. Kandi amazire emyaka enkumi mukaaga naayombeka Edeni ye, nk'oku Ruhanga yaamazire emyaka enkumi mukaaga kumariira Edeni Ye. Kandi ahabw'okubeihabeihabisa, okubeihabeihabisa omu Kigambo, nari abantu, hati akahamya Edeni ye omu nsi egi, omu kibi.

35 Edeni ya Ruhanga ekaba ehamiibwe omu kuhikiirira. Edeni ya Sitaane ehamiibwe omu kibi, ahabw'okuba Sitaane n'ekibi. Ruhanga n'okuhikiirira, kandi obukama bwa Ruhanga bukahamibwa omu kuhikiirira, omu busingye, n'amagara. Kandi obutegyeki bwa Sitaane buri omu kibi, kandi, ekibi ky'obunyadiini.

Yetegyereze oku yaabeihabeihabisa, okubeihabeihabisa kwe, nk'oku yaagizire ngu aryakora. Akaraganisa kukora eki. Hariho omuntu weena obaire naamanya ekkyo? Reka tubiikuure Isaaya, ku muraabe nimwenda Ebyahandiikirwe ebi. Ku mu . . . Nshemereire kujuriza bingi aharibyo, ninteebereza. Reka tubiikuure Isaaya eshuura ya 14, akaanya kakye, reero tureebe eki Sitaane yaagambire hanu, akaanya kakye. Omuri Isaaya 14, nituza kugishoma, tureebe eki omuntu ogu yaakozire. Isaaya 14, tandika n'omushororongo gwa 12.

Iwe nyonyoozi y'omu buturuturu 'we (Lusafeeri), omwana w'omushekkye, k'orugire omu iguru okagwa! Iwe owaabaire ocwa amahanga busha, k'otemirwe, okaza aha itaka!

Okaba ogira omu mutima gwawe otu: Ndyatemba omu iguru ahaiguru y'enyonoozi (abo n'abaana), enyonoozi za Ruhanga, Ekitebe kyangye nkite ahaiguru. Kandi ndyashutama aha rushozi rw'eiteeraniro, . . . okwo aha rubaju rwa bukiizi-bwa-buryo.

Kandi Ndyatemba mpikye ahaiguru y'ebicu, nyehindure, kandi mbe nk'Orikukira byona.

36 Hati gyeragyeranisa ekkyo hanu n'Ebyahandiikirwe byaitu ebindi omu kitabo ky'Abatesalonika, akaire kakye akaahingura, oku yaagambire ati, "Ashutami omuri hekalu ya Ruhanga, naayetunguura ahaiguru ya kyona ekyetwa Ruhanga, kugira ngu we nka Ruhanga aramibwe nka Ruhanga omu nsi."

Ngugwo aho ruhanga w'ensi egi ou mbabuuriireho saabiiti ehweire. Ngugu ari hanu eriizooba omu kubehabeihabisa, egoyshaaha y'akabi, obwire bukuru obwo obu tutwiremu. Nibwo bwire oburukirirayo kimwe kuba obw'ekitiinisa omu busingye bwona, ahabw'okuba tworekyereire Okutegyeka kwa Kristo kw'emyaka rukumi okukuru ogundi murundi; tworekyereire Edeni ogundi murundi. Kwonka omu busingye obu bwonyini, obugobya bwona, na buri kakoryo aku araakozeise kandi akabaasa kukabeihabeihesa, aburundaine hamwe bwona kandi yaayehamya; reero yaashuuma ahansi nka Ruhanga, kandi yaayeta omu mwanya gwa Ruhanga; omunyadiini, kandi naabaasa kujuriza Ebyahandiikirwe kandi naabaasa kukugambira Ebyahandiikirwe, nk'oku Sitaane yaakozire Haawa omu kibanja kya Edeni. Kwonka okutsigaho akacweka kamwe Kakyo, nikyo kyonka eki arikuteekwa kukora, kutaho ekihengere, ahu enyegyesa y'obutwa ya Sitaane erikubaasa kurabira, nk'akagyegyena k'omuntu orikuteekateeka aku tubaire nitugambaho ekirakiri.

37 Hati, akagira ngu naija kwetunguura okukira Rukira-boona; naija kutemba ahaiguru y'ebicu n'enyonoozi, kandi naija kushutamayo nka Ruhanga, aze ahaiguru ya Rukira boona. Kandi asingwire omu kuhikiiriza okukangisa kwe. Hataraho kubanganisa atungire obusinguzi oburukutangaaza omu kuhikiiriza okukangisa kwe, ahabw'abantu kumwikiriza kushoboorora naamaramu amaani, obukuru bw'Ekigambo kya Ruhanga omuri buri busingye, ekyaraganisiibwe omu busingye obwo. Buzima okwo nikwo akikozire. Omuri buri busingye, akakishoboorora naakimaramu amaani.

38 Omu biro bya Noa, akashoboorora ngu kikaba kitarikubaasika enjura kugwa neeruga omu iguru, ahakuba, "Tihariyo njura ahaiguru okwo." Engiri Ye nkuru ya sayansa ei yaabuuriire omu kibanja Edeni! Akaba naabaasa kwohereza eby'obyoma aha kwezi kandi ahamya ku hataraho amaizi ahaiguru okwo. Kwonka Ruhanga akagira ngu enjura eryagwa. Kwonka Sitaane akasingura, kandi yaashiisha ebiteekateeko by'abantu, kurabira omu

kusheruririza kwa sayansa, ati, "tikikaabaasa kukorwa." Kwonka kikakorwa. Ruhanga akagira ngu kiryakorwa, kandi kyakorwa. Akakikora.

39 Hati, omu biro bya-bya Yesu, akakora ekintu nikyo kimwe. Akagaruka yaashiisha ebiteekateeko byabo kurabira omu kubeihabeiba, mwareeba, kushoboorora kubi Ekigambo. "Ku oraabe ori Omwana wa Ruhanga, hati reka Nkureebe nookikoraho ekintu nanka."

Yesu tarazaine nawe. Tarakikozire na kakye. Ruhanga tari kazaanirizi. Tarikugyemwa kugarukamu ekintu kyona eki Sitaane arikubuuza. Akaba aine kwonka . . . Yesu akagira ati, "Kikahandiikwa, 'Toritungwa . . . Omuntu tatungwa by'okurya byonka, kureka n'Ekigambo kyona ekiruga omu kanwa ka Ruhanga.'" Mwareeba, kikaba Kitarikumwetaagisa kuzaana nawe. Kikaba Kitarikumwetaagisa kukora omugaati. Akaba naabaasa kukikora, kwonka Akaabaire yaahurikiza sitaane, n'ahabwe'kyo kikaba Kitarikumwetaagisa kuherikiza sitaane.

40 Kandi ogundi murundi n'ekibi ky'obunyadiini, nk'omu kutandika, okubeihabeiba kw'amaani. Kyetegyereze hati. Buzima tikiri ekibi kya ira ky'obutoosha, okushambana n'okusinda, kandi n'okuzaanisa Eiziina rya Ruhanga. Tikyo ekyo. Ngaaha.

Nimwijuka emyaka mingu ehwire, abaingi omuriimwe hanu, baak'aha kaira, nimwijuka eryo eishomo eri naabuuriire, aha, Okuhemuka Aha Kiro Ky'Orurbanja. Omushambani, tarikuza kuhemukirayo. Naamanya ahu arikuza. Omusinzi tarikuza kuhemukirayo. Orikuguza magyendo ebirkusinza, orikuteera zaara, omubeihi, omushuma, tarikuza kuhemuka. Kwonka, ogwo muntu orikuteekateeka ngu ahikire, aho niho okuhemuka kuri.

Niwe ogwo muntu, tugambe, orikwija akagira ati, "Mukama, tindabuuriire Engiri, tindabingire baadaimoni, omu Iziina Ryawe?"

41 Yesu akagira ati, "Murugye ahariiwe . . . Mundugye omu maisho, imwe abakora eby'obugomi. Tinkabamanyaga." Aho niho okuhemuka kuri, mwareeba, okwo kubehwabeihwa.

Ekyo nikyo ntuura obutoosha . . . aho niho barikunyetegyereza kubi munonga. Tikugira ngu niinyenda kuba ow'omutaano. Tindikwenda kuba ow'omutaano, kwonka ninteekwa kuba ow'amazima. Nyine Obutumwa, kandi Obwo nibuteekwa kuhika aha bantu. Nikituma butaayetegyerezibwa munonga omu bantu. Nibateekateeka ngu nimpakanisa buri omwe. Kwonka nibamanya, ngu ninkunda buri omwe, kandi ningyezaho oku ndikubaasa kubareetera Amazima, nk'oku kiri omu mutima gwangye kandi n'oku kiri omuri Baiburi hanu. Kandi Ruhanga ekyo akihamya kuba Amazima, n'ahabw'ekyo tihariho kindi kyona ekirkubaasa kukorwaho. N'ahabw'ekyo, yaaba Bakireeba, nari Batakireeba.

42 Mwareeba, tibarikwenda Kukireeba, ahawb'okuba baaherize kuguza, kuguza obukuru bw'okuba omujigaijo bwabo omu kibiina ky'ediini nanka, ekigombe ky'ediini nanka; kugyezaho obukuru bw'okuba omujigaijo bwabo, kuhika omu Iguru beegamiire ekibiina ky'ediini nanka, eki Sitaane ari omutwe gwa buri kicweka kyakyo. Ruhanga takagiraga ekibiina ky'ediini, takakiraga na kakye. Kandi nibeeguza ahari ekyo, ahi bo, ekibiina ky'abantu, bashoboorora Ekigambo reero bakagira ngu nikimanyisa eki kandi Nikimanyisa kiriya.

Ruhanga tarikwetenga omushoboorozi. We wenka niwe orikushoboorora. Tarikwetenga omuntu ondiijo weena Kumugambira oku araakikore. Naayemariirira. Akagamba oku Arikikora, kandi ogwo nigwo muringo ogu Arikuteekwa kurindamu Ekigambo Kye. Obu Yaagira ati, "Obumanyiso obu buryaguma nibukuratira abarikwikiriza," Akamanyisa ekyo kyonka. Eki Yaagambire kyona ngu kiryabaho, Akagira ngu kiryabaho omu biro ebi eby'aha muheru, ngu Aryakora ebintu nanka, kandi Abikozire. Taine omuntu weena ou arikubuuza yaaba nibwo bwire nari butaribwo. Naamanya obwire, na puraani.

43 Hati, Sitaane, omubeihi ogu, nk'oku kirikugambwa omuri Matayo 24:24, n'okuhabisa kwingi munonga. Hati, nitushanga ngu ahawba puroguraamu ze z'engiri y'obwengye, obwegyese burungi okukiraho, emicwe mirungi erikukiraho, okuhutuuka, n'ebindi, birogire abantu abarikwenda kuheereza Ruhanga, omu kwikiriza ekishuba kye.

Haawa akaba atarikwenda kukora ekyo, kwonka akamworeka oku kyabaire kirimu obwengye bwingi. Akaba atakumanya; akaba naayenda kumanya. Akaba atarikwetegyereza, kwonka akaba naayenda kwetegyereza. Kandi Ruhanga akamugambira ngu atagyezaho kwetegyereza.

Nimbaasa nta kwetegyereza kimwe aha bintu ebi? Tindikubaasa kubyetegyereza. Nimbiikiriza. Tirikunyetaagisa kubyetegyereza. Ruhanga n'okwikiriza kwonka tari okwetegyereza. Nitwikiriza eki Yaagambire kwonka.

44 Hati, gyeragyeranisa Edeni ya Ruhanga n'eya Sitaane hati, ahanyima y'emyaka enkumi mukaaga y'okukyamya okushoboorora kw'amazima kw'Ekigambo kya Ruhanga ekyaraganisiibwe aha busingye. Reka tukigyeragyeranise hati, reero tureebe ahu turaahikye. Nk'oku yaakozire aha kanisa omu-omu bwire bwa Kristo, omuri Yesu, naagyezaho kuzibira-kuzibira abaana ba Ruhanga b'obukama kumanya Amazima. Abo n'aba Ruhanga. Ruhanga akata abaana Be hanu, ebimurimu Bye, kukwatanisa Nawe kurabira omu kuhurira Ekigambo Kye.

45 Sho ku yaakukugambira, kandi naiwe ori omwana omwesigwa ahari sho, reero akakugambira ati, "Mwana

wangye, otaza omu maizi ago ebiso kuri, kuziha, ahaw'okuba harimu goonya omu maizi ago"; reero omuntu akagaruka, akagira ati, "Buzima, amaizi marungi nka gariya, tiharimu goonya"? Hati nooza kuhurira oha? Ku oraabe ori omwana w'amazima, nooza kuhurira sho.

Kandi omutabani w'amazima nari muhara wa Ruhanga atwara Ekigambo kya Ruhanga okubanza. Tindikufayo eki omuntu ondijo weena araakigambeho, nibatwara Ekigambo kya Ruhanga okubanza. "Harimu obutwa omu kikopo," kandi nibakiikiriza.

Kugira okwikiriza omu Kigambo Kye kyona, Embibo Ze, zikareeta Edeni y'oburikwera, rukundo, n'Amagara Agatahwaho. Ekyo nikyo Edeni ya Ruhanga yaareetsire, oburikwera. Kandi zikareeta Edeni y'oburikwera, ya rukundo, okwetegyereza, okuhikiirira, n'Amagara Agatahwaho. Ekyo nikyo Ruhanga arikubyara, Ekigambo Kye, Embibo Ye. Ekyo nikyo Ekanisa Ye eriba aha muheru; Neija kuba ekintu nikyo kimwe.

46 Yetegyereze, nkiki hanu ekiteekateeko. Otakyebwa. Niinyija kukihikaho obundi bwire nari omu bundi Butumwa. Kwonka, noomanya, Ruhanga akagira ati, "Reka buri mbibo eyezaare." Ekyo n'ekiragiro kya Ruhanga? Hati nikigasha ki omubuurizi weena, nari omuntu ondijo weena, kugyezaho kutuma Ekigambo ekyo kyagamba ekindi kintu? Mwareeba, buri Kigambo kya Ruhanga n'Embibo. Yesu nikwo yaagambire, "Embibo ei omubibi yaabibire." N'ahabw'ekyo Mako 16 ku kiraabe kiri Ekigambo kya Ruhanga, nikija kwezaara. Malaki 4 ku kiraabe kiri Ekigambo kya Ruhanga, nikija kwezaara. Na buri kuraganisibwa okundi kwona nikuteekwa kwezaara.

47 Mwareeba, nooreeba Sitaane aheeru hanu arikwehindura eki atari? Naagyezaho kugira ngu, "Tikyo, tikwo kiri." Nimukyetegyereza? [Abateeraine baagira bati, "Amiina." -Omur.] Mwareeba, Sitaane naagira ati, "Oo, Ekyo tikiri ky'ebiro ebi. Ekyo, ekyo-ekyo . . . Ekyo kikaba kiri eky'obundi bwire. Ekyo, ekyo nangwa tikirikumanyisa ekyo."

"Buri mbibo neeteekwa kwezaara." Okwo nikwo Ruhanga yaahamize Edeni Ye. Ekyo kihikire? [Abateeraine baagira bati, "Amiina." -Omur.] Kandi nkiki hanu, okwo nikwo Ruhanga ahamya Ekanisa Ye, buri Kigambo omu muringo Gwakyo! "Omuntu tatungwa by'okurya byonka, kureka n'Ekigambo kyona ekiruga omu kanwa ka Ruhanga." Mwareeba? Sitaane, naaza kutwara ekindi kintu. Kwonka Ruhanga akagira ati, "Buri mbibo omu muringo gwayo."

Okuraganisa ku kuraabe kwagizire kuti, "Obumanyiso obu buryaguma nibukuratira abarikwikiriza."

Hati ekanisa neegira eti, "Yegaite aha kanisa. Garukamu enyikiriza y'ediini. Manya katikisimu." Tiharimu ebantu nk'ebyo omuri Baiburi yoona.

Kwonka Yesu akagira ati, "Obumanyiso obu buryaguma nibukuratira abarikwikiriza: omu Iziina ryangye baryabinga baadaimoni; baryagamba endimi nsya; ku barikwata enjoka, nari kunywa ebirikwita, tibiribarwaza; ku barita engaro zaabo aha barwaire, baryakira." Ni muntu ki orikuhananisa ekyo? Mwareeba?

48 "Buri mbibo neija kwezaara." Ku oraabe ori embibo ya Ruhanga, ekimurimu, omwana wa Ruhanga, obwo Ekigambo kya Ruhanga kibyairwe omuriwe. Mwareeba? Reero waahurira Ekigambo kya Ruhanga, "Entama Zangye zihurira Eiraka Ryangye; ou zitarikumanya tizimukuratira." Waakitunga? "Obwo buri mbibo neerugayo omu muringo gwayo."

49 Hati nitushanga ngu, buri mbibo omu kwezaara, hakaba hatariyo okufa omu nsya . . . omuri Edeni egoy. Tiharibayo okufa omuri Edeni ensya. Mwareeba, hakaba hatariyo, hatariyo ekindi kyona kwihamo oburikwera, okushemera, n'Amagara Agatahwaho.

Hati, ahaw'obutaikiriza omu Kigambo kya Ruhanga kyona, kireetsire embibo y'obutarikwera omuri Edeni ya Sitaane. Hati nitutaahamu obu Sitaane arikwema aha ngoma, nka antikristo, omuri e-Edeni y'ensi egi, Edeni y'ekibi, ediini ekiikami. Taratandikire naagira ati, "Ndi Sitaane. Ndi maraika omukuru." Ngaaha, t'ahari ekyo, kureka aha kukiikamya Ekigambo kya Ruhanga. Kandi okwo nikwo areetsire obukama bwe, omuri buri busingye. Kandi hati omu busingye bukuru obu oburikuhabisa, ayeteekateekire kwema aha ngoma, aha bantu be! Ayeyombekyeire Edeni ey'abanyabwengye, ey'abeegire, y'ebya sayansa; kihikire, ababuurizi b'ebya sayansa, ekanisa y'ebya sayansa, enyegyesa y'ebya sayansa omu by'ediini, buri kintu n'ekya sayansa. Buri kintu kiri aha musingye gw'obwengye. Ekanisa yoona eyombekirwe aha bwengye. Teyombekirwe aha kwikiriza.

50 Rimwe nkaza kukora oruteerano omu kanisa y'omuntu. Kikaba kiri ekishengye ky'okuteeraniramku kihango omuri buregyerwa-izooba. Omuntu murungi, kandi akaba naahakanisa ebantu ebi ebiturikugambah. Kwonka nabwo, akaba ari . . . Nkamukunda; omuntu murungi, omugurus. Abantu be ku baashohoire aheeru . . . Kikaba nikishutamisa abantu nk'enkumi mukaaga. Abantu be ku baashohoire aheeru, omu saaviisi y'eihangwe, nka rukumi na magana ataano, boona bakaba bari abeegire abajwaire gye, nkashutama aho kandi naabareeba.

Akabuurrira eishomo rirungi munonga, omuntu ogwo akabuurrira. Reero yaabuuza yaaba hariho omuntu weena orikwenda kwakiira Kristo; kwimutsya emikono yaabo kwonka. Kwonka tihaine n'omwe owaimukize emikono ye. Reero aha muheru omukazi yaimutsya emikono ye. Yaagira ati, "Ni kirungi, hati waaba Omukristaayo," kandi yaamubatiza. Reero ku yaagiire aheeru . . . Akashoroora omwerefere, yaanywegyera ogwo mwerefere mukye kandi yaamushabira, reero yaasiibuura abantu.

51 Abashomi be ku baashohoire; abantu boona bari barungi, abakugu omu by'obwegye, abeegire. Obwo nkaba nyemereire aha rubaju, kumukwata omu ngaro n'okumuramutsya, obwo ariyo naashohora.

Ku naaherize kumuramutsya, mbaba hanu abashomi bangye baija baataahamu. Bakaba batarikubaasa kubaikiriza kutaahamu obu abashomi be baabaire barimu. Mbaba hanu abangye baija, omu bugaari bw'abarema, engozi, abashazi ababohirwe, abagwire eiraro, n'abandi boona. Nooreeba omutaano? Nikyo ekyo. Ekyo nikyo kintu eki ndikugambaho, mwareeba. Mwareeba, n'ekintu ky'omutaano.

52 Kunu, ahabw'obwengye bwa sayansa noobaasa kukora Engiri erikwetegyerezibwa, ngu, iwe, "orikwikiriza Yesu Kristo taricwerwa rubanja," mwareeba.

Kwonka, "Obumanyiso obu buryaguma nibukuratira abarikwikiriza," mwareeba, naaremwa kutamu Ekyo, mwareeba. Ogwo mukazi akaikiriza Yesu Kristo, ajunirwe, obumanyiso obu ku burakuratire omwikiriza.

"Orikuhurira Ekigambo Kyangye," kutarikufa kwehindura ekintu nanka, kutari Kukihurira n'amatu ge, kureka, "Okukyetegyereza." Buri muntu weena naabaasa Kukihurira; maraaya naabaasa Kukihurira kandi agume ari maraaya; mwareeba, omusinzi naabaasa Kukihurira; omubeihi naabaasa Kukihurira kandi agume ari omubeihi. Kwonka, "Orikwetegyereza Ekigambo Kyangye, akaikiriza Owantumire, aine Amagara agatahwaho." Nikyo ekyo, mwareeba.

Kandi tihaine omuntu orikubaasa kukora ekyo kureka Ruhanga yaaba yaamumanyire ira atakabaireho. Yesu akagira ati, "Tihariho orikubaasa kwija Ahariinye, Tata yaaba atamwiriize haihi, kandi abu Tata yampaire boona baryajia Ahariinye." Amiina. Byona n'okwemariirira hamwe n'okumanya ira kwa Ruhanga. Atuura wenka, kandi tihariho omuntu weena Orikumugambira eky'okukora.

53 Hati, ahabw'obutakiriza, omu kutakwata Ekigambo kya Ruhanga kyona, kireetsire embibo y'obutakiriza, ey'obutarikwera, ey'ekibi, rwango, n'okufa kw'Ebiro n'ebiro biri omu busingye bw'ekanisa obu obubi, obw'obwengye bw'obuntu. Hati waakyetegyereza? Omu biro ebi, obu ensi yoona eri enyadiini! Obaire nookimanya? Ensi yoona n'enyadiini. Kandi omu busingye obu obw'obunyadiini, amakanisa mahango ahari buri nshonda; buri kintu, byona nibihwera omuri Sitaane ariyo naaramibwa. Nkiki hanu, hanu honyini omuri Baiburi. Ekyo kihikire. Kandi omuri zaaseminariyo ezi z'eb'yediini, z'obwengye bw'obuntu ezireetsire omuntu w'obwengye bw'obuntu otendekirwe oku araagambe, eky'okukora, oku baraakyamukirire; na buri kintu nka saikorogye, emyaka eshatu n'emyaka ena, kumanya oku oraakore n'ebiteekateko by'omuntu. Mwareeba, ni . . .

Omwoyo wa Ruhanga ti kintu eki, iwe, orikwegyesibwa. N'ekintu ekyashoroirwe ira omuriyiwe, n'omukono gwa Ruhanga ow'Obushoboorozi bwona. Obumanyi bwawe tiburikubaasa kukutendekwamu nari kukwegyesibwa. Bukashoroorwa ira, n'omukono gwa Ruhanga n'okumanya ira kwa Ruhanga, omuriyiwe. Ekyo kihikire.

54 Hati, kikareeta Edeni egi y'amaani ei batwiremu hati, Edeni y'ekanisa y'ensi. Boona nibeegaita hamwe hati omu Rukiiko rw'Amakanisa ageeteeraine, kandi nibaza kugira ekanisa y'ensi boona barikwija ahansi y'omwebembezi omwe, ahu Sitaane araije kwemekwa, buzima nikwo.

Kandi okweta kw'aha muheru nikugyenda omu maisho, kukwata Omugore Atakataahire omuri ekyo. Ahabw'okuba ekyo ku araakitaahemu, naaba yaateebwaho akamanyiso k'enyamaishwa, kandi naahwerekyerera, taribaasa na kakye kukirugamu. Niyo nshonga, naagira ati, "Mubarugyemu, imwe bantu Bangye 'mwe," katakamugiiremu, mwareeba. "Mubarugyemu, mubeetaaniseho."

55 Hati, rwango na rufu, n'okutaana na Ruhanga Okutahwaho, omuri Edeni egi; okurigira okubi, oburofa, okukiikamy, (bata?) ahabw'okubyara embibo mbi.

Nikiinyijutsya okworekwaa oku naareebire ntakabugaine Abapentekoote, okw'Omuntu ogwo arikwetooroora ensi, ajwaire ebikwera. Muhuriire ninkigamba emirundi mingi. Kandi omwe akaja enyima ye, naabiba embibo z'okwangana.

Kwonka akanguhirwa okurusingura, omuri Haawa . . . omu kibanja kya Edeni, ahabw'okwetenga okubi kwa Haawa; okwetenga okubi kwa Haawa, okw'ekibi. N'ahabw'ekyo, Haawa ku araabe yaayetengire obwengye, kikaba ekibi.

Naitwe ku turikwetenga obwengye, tukenda diguri ya Ph.D., LL.D., n'ekibi kukora ekyo. Ebyo n'ebigambo ebignumire, kwonka nigo Mazima. N'obu kiraabe kigumire kita, nabwo n'Amazima, mwareeba. Okwetenga obwengye, okwetegyereza!

Enshonga ni, ngu, ebiro ebi titurikugyezaho kuhamya Ekigambo kya Ruhanga omu mitima y'abantu. Nitugyezaho kwehamya itwe twenka. Amakanisa nigagyezaho kuhamya enyegyesa y'ekanisa, omu mitima y'abantu.

Nituragiirwa kuhamya Ekigambo kya Ruhanga. Paulo akagira ati, "Tindaizire ahariimwe n'ebigambo by'abantu eby'okwikiririsa, ngu okwikiriza kwanyu kwegamire okumanya kw'omuntu; kwihamo nkaija ahariimwe omu maani; omu kweyoreka kw'Omwoyo Orikwera, ngu okwikiriza kwanyu kuhuumurire omuri Ruhanga." Nikyo ekyo.

56 Omuntu nooteekwa okuteehamya iwe wenka. Nitukishanga omu . . . Reka Ruhanga akorere omuntu ekintu kandi amutume, nooshanga buri muntu naagyezaho kukitooreza. Mwareeba, nibagyezaho kwehamya bo bonka. Buri muntu ati, "Nkakora eki. Nyowe, nyowe, eyangye, ekigombe ky'ediini yangye, nyowe, eki," nibeemahamya bo bonka. Nitubuurira ahari ki, itwe twenka nari Obukama bwa Ruhanga?

Hamya Ekigambo kya Ruhanga. Ihamu obutaikiriza reero ohamye Obukama bwa Ruhanga omu mutima gw'omuntu. Kandi Obukama bwa Ruhanga tiburikubaasa kuhamibwa omu mutima gw'omuntu shana Ruhanga yaaba yaamukozire atyo. Tarikubaasa kuhamibwa omu . . .

Kandi, oijukye, ekicweka ekirikuhabisa, omuntu ogwo naateekateeka ngu kihikire. "Hariho omuhanda ogu omuntu ayeta murungi." Buri munyabwengye naareebeka nk'ohikire.

57 Nk'oku naabagambiire Saabiiti nkye ezaahingwire; obu naayemereire aha rubaju rw'omwana wangye naafa, na Sitaane ayemereire aho kandi naagira ati, "Sho ngugwo aho, afeereire omu mikono yaawe ekiro kiri. Omukazi waawe ngugwo aho arambiire hansi aho omu-omu k'abafu, kandi omwana waawe ngugu hanu ariyo naagyenda. Kandi Omushabire kukugarukamu, kandi Yaakurura eyaawe . . . Yaashuumya ekicuucu ahaiguru yaawe. Hati, kwonka nabwo Ni Ruhanga murungi, kandi nabwo okagira ngu N'Omутambi. Kandi naiwe, oyemerereire eki waagizire ngu kihikire, ogwire." Oo, buri kuhaajaana, buri kacweka k'obwengye kakaba nikateekwa kwikiriza ngu kihikire; kandi akaba ahikire, batyo.

Okwo nikwo yaabaire ahikire obu yaagambira Haawa ati, "Amaisho gaanyu nigaza kwiguka, nimuza kumanya ekihikire n'ekigwire. Nimuza kuba nka baaruhanga, omu muringo ogwo, mumanye ekihikire n'ekigwire," ahabw'okuba Ruhanga nabwo, akaba atakabaikiriize kwereeba bo bonka ku baabaire bajwaire busha. N'ahabw'ekyo bakamanya ngu nibaija kumanya ekihikire n'ekigwire; kandi akaba ahikire. Kwonka, nooreeba, kikaba nikihakanisa Ekigambo kya Ruhanga.

58 Kandi nikwo kiri n'aha baheereza omuri zaaseminariyo, nibeega eby'ediini ebigenzirwe abantu; nikibaasa kushushana nk'ekihikire, nikibaasa kuba okwetegyereza kurungi kw'ekintu ekyo, beitu kigwire.

Tikirkutwetaagisa Kukyetegyereza. Nitukiikiriza ahabw'okuba Ruhanga akagira ngu nikwo kiri, kandi ekyo nikimara ebiro byona. Ekintu kyona, ogwo nigwo muringo gw'Okukiikiriza.

Oo, Haawa ka yaayetengire kutunga diguri ya Ph.D., mwareeba, ka yaayetengire kuba omunyabwengye munonga okukira oku yaabaire ari!

59 Yetegyereze oku baabaire nibashusha, omushaija n'omukazi we . . . Hati yetegyereze, omushaija n'omukazi, bombi bajwaire busha omu kibanja kya Edeni, Edeni ya Ruhanga.

Hati naaza kuhendera. Naagira ngu naaza kugumizamu edakiika nkye kwonka. Reeba, yetegyereze hati, ndiyo nimpendera.

Gyeragyeranisa eki hati, oku barikushushana omushaija ogwo n'omukazi we, bombi omuri Edeni ya Ruhanga, batajwaire ekijwaro na kimwe, batarikukimanya. Ahabw'enki baabaire batarikukimanya? Ahabw'okuba ebihurikizo byabo by'okujwara busha bikaba bishwekirwe, n'Ekyetwekyerero Ekirikwera, Omwoyo Orikwera. Bakaba nibabaasa kureebana butunu, kwonka bakaba batarikumanya ku bajwaire busha. Bakaba bashwekirwe Omwoyo Orikwera, w'oburikwera. Bakaba bashwekirwe.

60 Ekyetwekyerero kya Ruhanga, na hati, noobaasa kureeba kandi otaayetenga kubi. Nibahindura emitwe yaabo. N'Ekyetwekyerero Ekirikwera, mwareeba, Ekyetwekyerero Ekirikwera. Ruhanga akatuma amaisho gaabo . . . bombi bakaba, omwe akaba ari omushaija ondijo ari omukazi, kwonka bakaba batarikumanya ngu bajwaire busha, ahabw'okuba oburikwera bwa Ruhanga bukaba bushwekirwe amaisho gaabo. Yetegyereze, Ruhanga akashereka emitima yaabo ekibi, n'Ekyetwekyerero Ekirikwera.

Kuri twine obwire tukaguma ahari ekyo, edakiika nkye. Reeba hanu, "Ahabw'okuba ogwo, orikuramya ku yaakuheriza kushemezibwa rimwe," Abaheburaayo, "orikuramya ku yaakuherize kushemezibwa rimwe, naaba atakiine kwemanyaho ekibi." Ekibi kimurugireho.

61 Mpuriire Ow'eishe-emwe Neville naagamba, akasheeshe aka; hariho omuntu obundi obaire naamubuuza ngu ahabw'enki ntatuuriire aha Mwoyo Orikwera, ahabw'enki ntakozire eki. Nkiki hanu. Omwoyo Orikwera n'okukora okuri omuriwi. N'Amagara, t'okukyamukirira; t'ebintu ebirikweyorekyera omu mubiri. Kwonka n'Omuntu, Yesu Kristo, Ekigambo kya Ruhanga kihamiiwe omu mutima gwawe, kuhindura ekihuriire buri Kigambo ky'obusingye obu. Kihikire. Yetegyereze Omwoyo Orikwera omu bikorwa, kitari munonga omu kweyoreka; kureka, omu kukora, eki Arikukora kurugiirira aha Kigambo.

62 Yetegyereze hati Omwoyo Orikwera, w'Ekigambo kya Ruhanga Ekirikwera, akatuma omushaija n'omukazi bajwara busha, tibaakimanya. Ka ni kirungi, Amagara g'Ekigambo; Embibo, Ekigambo!

Ruhanga akagira ati, "Hariho omuti ahagati y'ekibanja, omukazi. Kandi ahagati y'ekibanja harimu omuti ogu; n'okugukwataho mutagukwataho. Ahabw'okuba, eizooba eri muriguryaho, eizooba eryo muryafa." Bakaba batairweho ekyetwekyerero ekirikwera kutagureeba, bataine ki barikugumanyaho, batarikwehanga kugukwataho.

Bakaba batairweho ekyetwekyerero ekirikwera. Bakaba bari buhooro omu ihema rya Ruhanga. Bakaba bari abahuriire. Okufa kukaba kuri hare nabo. Haleluya! Omwe akaba ainiire mugyenzi we rukundo ehikiriire, Amagara agahikiriire ebiro byona. Bakaba baine rukundo ehikiriire, okwetegyereza okuhikiriire kwa rukundo ya Ruhanga. Bakaba baine Ekigambo kya Ruhanga, kandi bakirinzire. Kandi bakaba bari abahuriire kandi bari buhooro omuri Edeni ya Ruhanga, hatariho okufa na kakye haihi nabo.

63 Bwanyima, Sitaane yaatuma Haawa yaahurikiza engiri ye y'ebi'ediini, engiri y'obwengye, okwega okw'ahaiguru, emitwarize y'ahaiguru, okuhutuuka okurikukira oburungi, obwegyese bw'ahaiguru, n'ebindi; reero ku yaamuhikize aha kwemerera n'okumuhurikiza edakiika emwe, aha kuhaajaana kwe (oku turikuragiirwa kureka), ku yaamuhikize aha kugihurikiza.

“Hati, reeba hanu, ekanisa eri eti n'eti. Etwireho kumara obwire buraingwa munonga. Turi emwe aha makanisa aga ira omu ihanga. Meeya w'orurembo nimwo ashomera.” Tindikufayo eki eri, mwareeba. Ku eraabe neehakanisa Ekigambo kya Ruhanga, gihakanise. Ogwo n'omuzigu waawe. Ekintu kyona ekirikhakanisa Ekigambo n'omuzigu waawe.

Ekintu kyona ekirkushagika Ekigambo n'ow'eishe-emwe mugyenzi waawe. N'ekicweka kyawe.

64 Yetegyereze, Haawa akaihaho Ekyetwekyerero Ekirikwera, kureeba buzima eki okumanyana kw'omukazi n'omushaija kyabaire kiri; gyeragyeranisa ekyo, eki okwetenga kubi buzima kurikubaasa kukora. Akaiha Ekyetwekyerero aha maisho ge, ekintu ekirikwera eki Ruhanga yaabaire ataire aha maisho ge. Akaba naayenda obwengye, kumanya eki kyabaire kiri; n'ahabw'ekyo akaihaho Ekyetwekyerero kureeba eki kyabaire kiri. Akatega Sitaane amatu, kandi yetegyereze omwanya ogu kyamuteiremu.

Bakozire ekintu nikyo kimwe omuri buri busingye ahanyima, obutoosha batwara orubaju rw'obwengye bw'obuntu; kandi hati bombekire obukama bwa Sitaane, obwengye, embibo ye ei yaabibire, kandi ehindwire ensi kuba Edeni y'okufa.

65 Hati yetegyereze. Hati reeba ekitabo ky'Okushuururwa 3, Obusingye bw'Ekanisa ya Laodikea. Kiteekateekyeho omu biteekateekyo byawe.

Hati yetegyereze. We, Haawa, n'omugabekazi wa Sitaane. Mwareeba, Sitaane, enjoka, ekabanza kuhika ahari Haawa Adamu atakamuhikireho. Mwareeba? Ekyo kihikire. N'ahabw'ekyo akamubeihabeisha, mwareeba; n'ahabw'ekyo Sitaane, enjoka, ekaba iba wa Haawa Adamu atakamumanyire. Mwareeba, ekamubeihabeisha. Baiburi neegira ngu ekakikora, yaamanya ku ajwaire busha, obwo. Mwareeba?

66 Hati reeba O-Obusingye bw'Ekanisa ya Laodikea. We, Haawa, ashutami nk'omugabekazi wa Sitaane. “N'omutungi omu bintu by'ensi; empumi, ajwaire busha ogundi murundi, kandi tarikukimanya,” nk'oku kyabaire kiri omuri Edeni ya Ruhanga. Kwonka hati, t'ahabw'okuba ngu Ekyetwekyerero Ekirikwera kiri ahaiguru y'amaisho ge, kureka ekyetwekyerero ky'okwetenga okubi. Ekyo, akajuura Ekyetwekyerero Ekirikwera kya Ruhanga, yaajwara ekyetwekyerero ky'obwengye, ahabw'okwetenga okubi. Mbwenu hati aine ekyetwekyerero ky'okwetenga okubi, ngu “n'empumi” kutamanya ngu n'ekibi. “Ajwaire busha” omu nguuto z'omu rurembo, “kandi tarikukimanya.” Ni maraaya omu nguuto z'omu rurembo. Abakazi abajwaire ebijwaro bigifu munonga ebi, omu maisho ga Ruhanga, ni maraaya, “kandi tibarikukimanya.”

67 Yetegyereze, reeba abakazi baitu. Hati, ku oraabe nooyenda kureeba embeera ei ekanisa erimu, reeba omuringo ogu abakazi barikutwazamu. Obutoosha omukazi ajwekyera ekanisa. Omuri Edeni ya Sitaane, y'ekibi n'obutaikiriza, okukiikamya kw'ebi'ediini; obukama obukiikami. Omu mwanya gw'okutwara Ekigambo kya Ruhanga, batwaire okwega kw'obwengye bw'obuntu. Kandi omu mwanya gw'okutooranamu Ekanisa, baatoorainemu ekibiina ky'ediini, kandi nibakireeta kukihitsya aha mwebembezi omwe omukuru.

68 Hati yetegyereze, bakakiikama kuruga omu kutagira rubanja. Mutafeerwa eki hati. Ekanisa etwire ejwaire ekyetwekyerero eki ky'okwetenga okubi. Yetegyereze eki kigikoreire. Ki-kigikiikamize kuruga omu kutagira rubanja kyagihitsya aha kugira obwengye. Mwareeba? Ekyetwekyerero Ekirikwera, omukazi akaba ataine rubanja; n'ekyetwekyerero ky'okwetenga okubi, ni bwengye. Naamanya ngu nikishemeza. Naamanya eki kirikukora, mwareeba. N'ekijuma, omuti ogurikwetengwa, kuha omuntu obwengye. Mwareeba? Akiikamisiibwe kuruga omu kutagira rubanja kuhika aha kugira obwengye, kuruga omu burikwera kuhika aha kusiisikara n'okwetenga okubi, hamwe n'okuruga omu Magara kuza omu kufa.

Obukama obu nibuteekwa kufa. Obukama obu buryafa! Ruhanga w'omu Iguru aryabuhwerekyereza buhwaho.

69 Yetegyereze, omu kukiikamya oku, kurugire aha mushaija kwaza aha mukazi, kandi kwaruga aha mukazi kwaza aha mushaija, “kandi tibarikukimanya.” Ekintu kirungi munonga ekirugire omuri Edeni ya Sitaane, ku oraayetegyereze enguuto z'omu rurembo ebiro ebi, aha bantu baitu b'omurembe.

70 Yetegyereze, akaba ari Haawa ou Sitaane yaakozesize kureetera Adamu yaashiisha ahabw'amaani ge g'okwetenga okubi. Hati nikyo kimwe, naakora ekintu nikyo kimwe ebiro ebi. Yetegyereze, eishokye rishazire, amaisho gasiigire erangi, enjwara y'obwa maraaya, mwareeba, omukazi naakora ekyo, kwonka tarikumanya ngu buri kimwe omuri ebyo binto nikhakanisa Ekigambo kya Ruhanga. Okushara eishokye rye, nikimuhindura

omukazi otaine ekitiinisa, maraaya. Okujwara ebijwaro bigufu munonga, nikimuhemura. Okujwara ebijwaro by'obwa maraaya, nikimuhindura maraaya. "Kandi tarikukimanya," t'ahabw'oburikwera bwa Ruhanga; ahawb'okwetenga okubi kwa Sitaane. Akareetera . . . Naatuma Adamu we yaamurigira.

71 Omukazi akajuura ebijwaro ebi Ruhanga yaamujwekire, enyima okwo omuri Edeni, ahawb'orugyendo rwe okuraba omu-omu ihamba eri. Akabijuura. Akeejweka busha. Kunu, Ruhanga yaabaire amushwekire weena n'empu; akatandika kusharaho kakye buri kaire, hati agarukire enyima ahu yaabaire ari omu kutandika.

Hati omukazi atumire Adamu we yaajwara ebijwaro bye eby'omunda. Omushaija kujwara obuhare bugufu obwo obukuzire oburikushushana nk'obw'ekikazi, kandi akaza aheeru hanu, tindikuteekateeka ngu ainemu ak'obushaija koona omuriwe. N'omushaija orikwetwara nk'abakazi orikukirirayi kimwe ou ndikumanya. Mwareeba? Mwareeba, atumire Adamu we okiikami yaatwaza nkawe, mwareeba, kujwara ebijwaro bye by'omunda. Akareeba eki yaabaire naabaasa kukora aheeru okwo obu yaajuura ebijwaro bye byona akatsigaza ebijwaro bye by'omunda byonka. Ezo n'empare ngufu. Hataraho okubanganisa, ebyo n'ebijwaro by'omukazi by'omunda, mbwenu hanu Adamu we azijwaire hati. Eki, kurugiirira omu Kigambo kya Ruhanga ekyabandize, "N'ekihagaro omukazi kujwara kishaija, n'omushaija kujwara kikazi," kuruga omu Kigambo ekyabandize. Kiteekateekyeho!

72 Hati, omushaija nawe, naakora emishono y'eishokye nk'abakazi. Naarishokoza rigwa enyima, aritamu roora. Bimwe aha birikukirayo kutuma omuntu yaayenda kutanaka ebi ndareebire omu magara gangye, ni bamwe aha baana abo aheeru hanu ebiro ebi n'emishono yaabo y'eishokye rishokoize rigwire enyima nka bat, ririmu erangi, eishokye rihindwirwe n'erangi, n'omubazi gwa perokisaidi nka batyo, kandi bata erangi omu mashokye gaabo, baritamu amayengo na roora, nibakora emishono y'eishokye. Iwe kishaija 'we kihango ekirikwetwara nk'abakazi! Ekyo n'ekintu kibi munonga ky'okugambira aha kituuti, kwonka okucwa orubanja kutandikira omu nju ya Ruhanga. Torikumanya yaaba ori omushaija nari omukazi. Kandi mpuriire ngu eihe ryaitu rya Amerika niriza kuba nirijwara empare ngufu. Nikwo kiri. Mwareeba okukiikamya oku kuri? N'ebijwaro by'abakazi; naakora emishono y'eishokye y'abakazi.

73 Ekiro kiri nkaba ndi okwo, owa Howard Johnson; tari ogu hanu, kureka n'oriya aha muhanda waaba noosohohora. Kandi naashutama enyima nintangaara. Ngugu hanu omwojo muto yaija, omunwa gwe gwashami. Kandi akaba aine eishokye ririkwiragura hanu, kandi arishokoize omu muringo ogu; kandi atairemu roora, kandi aritairemu amayengo, rihikire ahaiguru y'amaisho ge; naareebera ahaiguru y'amaisho ge, naagyendagyenda. Ku ndaabe ndareebireho okukiikamya! Mwareeba, akaba atarikubaasa kukiikiriza. Akaba naabaasa kuhamya obundi ngu akaba ari omushaija, kwonka omu mwoyo gwe n'omukazi. Tarikumanya orubaju oru arimu omu nju. Ekyo kihikire. Ka n'okukiikamya!

Ekyo nikyo Sitaane akora. Akiikamya amahanga. Akiikamya ekanisa. Akiikamya abantu. N'omubeihi, orikukiikamya Amazima agaabandize.

Ruhanga akahanga omushaija kuba omushaija. Yaahanga omukazi kuba omukazi. Kandi Yaabajweka omu muringo ogutarikushushana, kandi Yaakimanyisa ngu bagume omu muringo ogwo kandi ngu batwaze omu muringo ogwo; gumwe n'ogw'ekikazi, kandi ogundi n'ogw'ekishaija. Akataanuura Adamu omu kibanja kya Edeni, kandi yaakora eki, yaatanuura Haawa yaamwiha omuri Adamu.

74 Hati naakora emishono y'eishokye nk'abakazi; omukazi naashara eishokye rye nk'ery'omushaija, kandi omushaija nawe naagyezaho kukora erye nk'ery'omukazi. Mwareeba? Omukazi naajwara ebijwaro by'omushaija by'aheeru, reero omushaija ajwara ebijwaro by'omukazi by'omunda. Hati, ekyo nikhirirwa nk'okurogota, kwonka tindikukimanya omu muringo ogwo. N'Amazima g'Engiri agatarikubanganisibwaho. Ku oraabe otarikukimanya, obwo hariho ekikushobireho; kimwe nooba ohumire nari shi nooba otakagyendahoga omu nguuto z'omu rurembo. Kandi omukazi naateekateeka n'omushaija naateekateeka ngu kihikire, haine ahi baahika.

Abakazi nibagira bat, "Mbweni, nihootsya munonga!"

Abahindi aba ira aba Apache ebiso okwo nibabaasa kutuma mwakwatwa enshoni. Oku barikweyongyera kutunga ekyoya, nikwo barikweyongyera kujwara ebijwaro, okwekingira omushana ngu gutabahikaho; oo, kutuma waatuutuka, kugira ngu obaase kutunga ekihuhiiso ky'embaho baaba nibagyenda. Mwareeba? Nibeemerera aheeru honyini omu mushana.

75 Tokaabaasize kwemera ekintu kyona; okaagira obuzimba nk'obw'amasya kandi otsya. Kwonka, nooreeba, n'eki orikweta obwegyese bw'ahaiguru. Sayansa y'eriigyenda ereetsire eki. Oo, mugyenzi! Ngugwo aho, "ajwaire busha," omuri Laodikea, "kandi tarikukimanya."

Omukazi akaba ajwaire busha omuri Edeni. Nooreeba obwo bukama bubiri oburikushushana? Bumwe n'obw'ekibi n'okufa; obundi n'amagara n'okuhikiirira. Okwo akaba ashwekirwe n'Ekyetwekyerero Ekirikwera. Bombi bakaba bajwaire busha; bakaba batarikukimanya. Bakaba bataine eki barikukimanyaho, ahawb'okuba bakaba bashwekirwe Omwoyo wa Ruhanga.

Kwonka hanu bashwekirwe n'okwetenga okubi, kandi nibareebana ku . . . Mwareeba, Adamu akaba naabaasa kureeba Haawa, kandi atamanye ngu ajwaire busha. Baitu hati n'ekyetwekyerero eki ky'okwetenga okubi,

tarikwetegyereza ngu ajwaire busha, kwonka naakikora ahansi y'ekyetwekyerero eki ky'okwetenga okubi kutuma abashaija baamureeba. Niyo nshonga yonka erikutuma yaakikora. Ekyo torikukiikiriza, kwonka nabwo nookikora, kandi omushaija naareeba. Kandi akareeba ngu naashemeza munonga, okuhistya obu yaizire yaajwara bimwe aha bijwaro byawé.

76 Oo, ka n'obuhabe! Ka n'obusingye! Ka n'obwire obu . . . Ka nibuhabisa! Oo, ebintu ebi byona, "kandi tibarikukimanya," omwoyo oguhabisibwe kimwe guri omu mushaija. Ashwekirwe okwetenga okubi kwa Sitaane, hamwe n'omukazi, nikwo ari. N'omwoyo gwa Sitaane gw'ekibiina ky'amaani. Mwareeba, tibarikukimanya, kwonka n'ekibiina ky'ediini. Abakazi abajwaire ebijwaro bigufu munonga, ni baamemba b'ekibiina ky'ediini. Abashaija abajwaire batyo, bari omu kibiina ky'ediini. Naaza kubaha okufunza kwakyo, E.A.K., Ekibiina ky'Ab'eishe-emwekazi Kihango, n'ahabw'ekyo ekyo nikyo barimu. Rugayo okwo, ekibiina kihango ky'abashaija barikutwaza nk'abakazi, bajwaire empare nkye ngufu ezikuzire, ekintu ekikuzire kihango ekirikureebeka nk'ekiine amafundo, ekirikureebeka nk'ekigubire. Ni-ni . . .

77 Mushaija 'we, hati noobaasa kutakirizana naanye ahari eki, kwonka ago nigo Mazima. Waaherize kuhabisibwa kwonka torikukimanya. Tori, tokitwaza nk'omushaija bundi. Mwareeba, bahindukire aboorobi munonga; kandi, abaana baabo, tibaribagirira mugasho bundi; abashaija, n'abakazi, nabo. Bo n'ekibiina. Nkikyo aho ekibiina ky'ediini. Ahabw'enki? "John, mutaahi wangye, naajwara ebijwaro bigufu munonga, mbwenu ababw'enki nyowe ntarikubijwara? Luella abaire naayenda ngu mbijware ababw'okuba John mutaahi wangye, naabijwara. Kandi, mbwenu, Susie Jane ku-ku araabe naabaasa kubijwara, na Martha Jane naabaasa kubijwara, nari Susie Lou," nari oku barikumweta kwona, mwareeba. Mwareeba, n'ekibiina. N'ekibiina ky'ediini. Ori memba waakyo omu mwoyo, kwonka torikukimanya.

78 Kandi ekyo ku kiraabe kiri kityo, kandi nitukireeba kiri kityo, naiwe nikwo ohumisiibwe. Ohumiire omu bigombe ebi by'amadiini ebi Sitaane akuzingazingiiremu. Kandi n'okukiikamya kw'Ekgambo kya Ruhanga ekyabandize, n'Obukama Bwe, na puraani Ye ahabw'abaana Be. Sitaane azingazingiire abashaija n'abakazi omu bintu ebi, kwonka tibarikukimanya. Okuhabisibwa!

Takiri mwana wa Ruhanga bundi! Emishono y'eishokye nirireereetera aha maisho ge, kandi ajwaire empare ngufu, naanyimbanyimba omu ruguuto rw'omu rurembo; omwana wa Ruhanga, omudiikoni omu kanisa, omuriisa aha kituuti? Ngaaha, ogwo tari mwana wa Ruhanga. Tararabire omu kagyegyena k'okuteekateeka kwa Ruhanga. Omushaija takaajwaire ebyo bijwaro by'abakazi; buzima takaabijwaire; omukazi nawe takaajwaire ebijwaro by'abashaija. Mwareeba, ti mwana wa Ruhanga. Ni mutabani wa Sitaane, na muhara wa Sitaane. N'ekintu ekigumire okugamba!

79 Sitaane asingwire omu kukiikamya n'okutegyeka ensi egi, kandi n'okugihindura obukama bwe; ei abantu baatairwemu, baine obugabe bw'okwecweramu, kwetooranirambo bo bonka omuringo gw'amagara agu baabaire nibenda. Kandi ekyo nikyoreka ekiri omu mutima gwawe. Mwareeba? Eiraka ryawe . . . Noomanya ki? Ebikorwa byawé nibigamba munonga, nabituma eiraka ryawe ritahurirwa.

Ka ntaayaayire omushaija. Reero agire ati, "Oo, ni . . . Twena turi Abakristaayo. Turi baamemba b'ekanisa." Kandi ebishushani by'abajwaire busha bahanikire omu ofiisi ye yoona? Eki yaakungambira tikikaareeta ho ntaaniso, nkaamanya okukiraho; naiwe nikwo.

Reka omukazi agire ngu n'Omukristaayo, aine eishokye rigufu? Haa! Noomanya okukira aho, mwareeba. Eego, sebo. K'agire ngu n'Omukristaayo, ayetaireho erangi kandi ayesiigire erangi, n'ebijwaro bigufu munonga, haza agire ngu n'Omukristaayo? Noomanya okukira aho. Ekgambo kya Ruhanga nikikwegyesa okukira aho. Ekgambo nikigira ngu tarikubaasa kukikora haza akaba Omukristaayo. Naaba nangwa ataine n'ekitiinisa, na buri kimwe. Ruhanga naaza kuta ekintu ekitaine ekitiinisa ata omu bukama Bwe? Ngaaha, sebo, nangwa na kakye. Ngaaha, sebo. Bo bonka, nibooreka okwetenga kwabo.

80 Torikubaasa kureetera enkombe kurya n'ekishamba, na kakye. Enkombe taine endurwe yoona. Terikubaasa kurya omutumbi ogwo ogujunzire. Ku yaakugurumaho, gukaagiita, kandi neekimanya. Kwonka ekishamba nikibaasa haihi kurya kyona eki kirikwenda. Mwareeba? Kiine endurwe nydingi.

N'ahabw'ekyo nooshanga ngu, okwo nikwo kiri n'ensi ebiro ebi, ekintu nikyo kimwe, "Bajwaire busha, n'empumi, kwonka tibarikukimanya."

81 Sitaane akakikora ahabw'okwetenga okubi kw'omukazi kw'okugira obwengye, okw'okumanyana kw'omushaija n'omukazi, oku yaayetooraniire we weka ahabw'okutoorana kwe wenka. Hati yetegyereze, ni Haawa owaayebembeire Adamu omu kukora ekibi, kandi n'omukazi owaihiremu ebijwaro bye Adamu atakaihiremu ebyo. Mwareeba? N'omukazi, burijo. Nikwo kitwire kiri. Na hati nikyo kimwe.

Ekanisa niyo erikuhabisa omuntu. N'ekanisa, mwareeba, eyebembera omuntu owaabaire naayenda kuba omwana wa Ruhanga. N'omukazi, ekanisa. Ti Baiburi, Ruhanga, ahabw'okuba Baiburi n'omushaija. Oo, yee, "Kigambo ogwo yaaba omuntu," kandi Akaba ari Omushaija. Mwareeba? Baiburi n'omushaija; ekanisa n'omukazi. Mwareeba? Ti kanisa . . . Baiburi tiyo ehabisa omuntu. Ekanisa niyo emuhabisa. N'ekanisa ei yaagyenzire nayo ajwaire busha, ti Baiburi. Mwareeba? Ngaaha, buzima. Baiburi emugambira ku ajwaire busha. Eego, sebo.

Hati yetegyereze oku, ahabw'okumanyana kw'omushaija n'omukazi, okwetenga eby'omubonano, omukazi akeetenga obwengye, okumanya eki eki kyabaire kiri, hamwe n'oku, yaaba ekijuma eki kyabaire kiri kirungi nari kitari kirungi. Reero yaakikora.

82 Ruhanga naija kugigarurayo ekiro kimwe, n'obu kiraabe, kurabira omu Mushaija. Omukazi niwe yaagihaireyo. Kwonka yaacungurwa n'Omushaija; ogwo mushaija, Yesu Kristo, niwe Kigambo.

Reero ni kintu ki? Yetegyereze, omu kuhendera. Hanu enshumi nkye ehweire, nkagamba ekigambo eki. Nyine ezindi mpapura nka ina nari itaano aho, kwonka ndi . . . z'Ebyahandiikirwe n'ebintu ebi naaba niinyenda kugambah. Kwonka, muhurikize. Reka tuhendere, nitugamba eki.

83 Nimwijuka, hanu enshumi nkye ehangwire, nkaba nimbeegyesa aha Nzamba Moshanju, obugyeniyi bw'okuteera enzamba, n'ebindi. Kandi nkagira nti, "Hariho obugyeniyi bw'ekiro kya munaana." N'ahabw'ekyo, ekiro kya mushanju nikiba kiri eky'aha muheru, ekyo nikiba kiri Okutegyeka kwa Kristo kw'emyaka rukumi. Kwonka hariho obugyeniyi bw'ekiro kya munaana; eki, kyaba kiri ekya munaana, kunu hariho ebiro mushanju byonka, nikiija kukihindura ekiro ky'okubanza ogundi murundi, kugarukira kimwe aha kiro ky'okubanza. Bwanyima, Okutegyeka kwa Kristo kw'emyaka rukumi ku kurihwa, obwo nihaija kugaruka habeho Edeni ehamaibwe. Obukama bwa Ruhanga bukuru nibuza kugarurwa. Ahabw'okuba, Yesu akaburwanira na Sitaane, omu kibanja kya Gesesemaani, yaayegarurira Edeni; ei, yaagiire kutebeekanisa omu Iguru, kugaruka ogundi murundi, ahaiguru omu Iguru. Akagira ati, "Emitima yaanyu etarishoberwa."

84 Obu Yaabaire ari hanu omu nsi, Akagira ati, "Imwe, imwe Bayudaaya 'mwe, nimwikiriiza omuri Ruhanga. Hati, Nimmanya ngu nyine eiziina ribi," nikwo Yaagambire. "Kandi nibagira ngu ndi eki, kiri, na kiriya. Kwonka, mwikiriiza Ruhanga; kandi nk'oku mwikiriize Ruhanga, Naanye muunyikirize." Akaba ari Ruhanga, oyorekirwe. Mwareeba? "Mwikirize nabwo omu . . ."

85 "Omu nju ya Tata harimu . . . mingi." Nimmanyisa, omu bintu bya Tata, omuri puraani za Tata harimu ebikaari bingi. Ninja kutebeekanisa omwanya. "Reeba oku guri muraingwa, sikweya mahiro rukumi na magana ataano! Oti, guri nkahi? Akaza kugutebeekanisa. N'Omuhangi. Naahanga ezaabu egoy yoona. Enguuto z'omu rurembo ni nk'endeerewamu. N'Omuhangi. Naatebeekanisa omwanya. Omu kitabo ky'Okushuuruurwa 21, naagira ati, "Nyowe Yohaana nkareeba Orurembo orurikwera, Yerusaalemu Orusya, nirushuuma kuruga omu Iguru ahari Ruhanga."

"Enyanja ekaba etakirih; eiguru ry'okubanza n'ensi y'okubanza bikaba bihweireho." Eiguru ryaitu ry'okubanza rikaba riri riiha? Rikaba riri Okutegyeka kwa Kristo kw'Emyaka rukumi. Ensi y'okubanza ekaba eri eha? Ekaba eri egi. Neija kuhunduuzibwa. Nk'oku yaabatiziibwe Noa, omu biro by'okubuurira kwe; ekeezibwa Kristo, Naagimiishaho Eshagama Ye; mbwenu neija kuhunduuzibwa, obukooko bwona na buri kintu bimarirwemu kimwe, omu kuhunduuzibwa kw'aha muheru, n'okubatizibwa kw'Omuriro okurikwija kwita buri kakooko, buri burwaire, buri ndwara, buri burofa oburabaireho omu nsi.

86 Neija kubaruka, reero habeho Ensi Enya. "Bwanyima naareeba Eiguru Erisya n'Ensi Enya. Eiguru ry'okubanza, ensi egi ey'okubanza, ekaba ehweireho; n'enyanja etakirih. Kandi nyowe Yohaana naareeba Orurembo orurikwera, Yerusaalemu Orusya, nirushuuma kuruga omu iguru ahari Ruhanga." Okwo Ruhanga naija kuba ari n'abantu Be ab'amazima, abatabani n'abahara, ahu Arikubaasa kuteerana nabo omu burikwera, amaisho gaabo gahumisiibwe aha kibi kyona. Tiharigaruka kubaho kibi bundi kuruga obwo n'okugumizamu.

Reka turwane mashaija; otabeihwabeihwa omu biro ebi, kureka, "Mwezirikye kutaahira omu irembo."

"Ahabw'okuba boona abarikwija kutsigara aheeru nibaija kuba bari abashambani, abarikurigira okubi." "Ori kureeba omukazi akamwetenga, biri aherize kumushambanaho." Boona hamwe . . . aheeru nihaija kuba hariyo abakazi abaine emicwe mibi, abashaija abaine emicwe mibi, n'abandi.

Kandi abo bonka abacungwirwe, kandi abari omu Kitabo ky'Amagara ky'Omwan gw'entaa nibaija kutaahira omu irembo. N'ahabw'ekyo mwezirikye, banywani; mutabeihwabeihwa omu biro ebi eby'aha muheru.

87 Obu n'obwire bukuru. Buri omwe aine esente. Buri omwe naabaasa kukora eki, kandi buri omwe naabaasa kukora kiriya, n'esente nizeeshuka hoonahoona, n'emotoka mpango, kandi na buri kimwe. Tihariho na kimwe omuri ebyo ekirikwija kuba omu Rurembo orwo. Tiharikwija kubayo emotoka n'emwe, endegye n'emwe. Ngaaha. Okutwarira hamwe nikwija kuba okuhutuuka okw'omutaano. Ogundi murundi nikwija kuba okuhutuuka okuteegamiire obwengye, tikuriba okwa sayansa, kureka okw'okutamanya kibi, n'okwikiririza omuri Ruhanga ohuriire.

Reka twezirikye kutaaha omuri Ekyo. Ahakuba ekyo nikyo kigyendererwa kyangye kyona, n'okutaaha omuri orwo Rurembo ekiro kimwe; reero nkareeba enyima, abarikurugayo naanye, nkareeba buri omwe omuriimwe naatambura, obu turyeshongora, "abarikwera nibataahamu." Niinyenda kuba omuri ogwo mubaro abarikwera ku bariba nibataahamu.

Reka tushabe.

88 Tataitwe ow'omu Iguru omukundwa, nk'oku ebiro biriyo nibihwayo, kandi nitubireeba nibiirira haihi, okuraganisiibwa nikwirira haihi. Nitushaba, Ruhanga Omukundwa, ngu ekyo okite omu mitima yaitu, kugira ngu tutabaasa kukora enshobe yoona. Ruhanga Omukundwa, rinda emitima yaitu egume eshemeire. Rinda emitima yaitu egume eshwekirwe, Mukama, amaisho gaitu gashwekirwe garemwe kureeba ebintu by'ensi, n'ebintu by'ensi ebitaine mugasho, okwehimbisiza omuri busha kw'okuhinduka omuntu w'amaani nanka.

N'obu bakuba bari ab'amaani bata, abagabe boona, abakama, abategyeki bakuru, n'ebindi bintu byona nibiteekwa kuhwerekyerera, kandi tibarizooka omu kwaka- . . . omu kuzooka kw'okubanza. Ahabw'okuba kikahandiikwa ngu, "Aine omugisha kandi n'orikwera, ogwo muntu oine omugabo omu kuzooka okwo kw'okubanza, ori nk'ogwo okufa kwa kabiri tikumwineho bushoborozi." Ai Ruhanga! "Okufa kwa kabiri," okufa kw'omwoyo, "tikwine bushoborozi"; acungwirwe!

89 Ai Ruhanga, okuteekateeka ngu emwe omu shaaha ezi, omwe naija kuba naaza kutaayaayira ondijo, kwonka atwarwe. "Babiri baryaba bari omu kitanda kimwe; haryatwarwa omwe, kandi ondijo atsigweho. Babiri baryaba bari omu musiri; Ndyatwara omwe, kandi ondijo atsigweho."

Ai Ruhanga, tuhwere tube abashemeire omu-omu maisho Gaawe, Mukama, n'obu omuntu yaakuba naatuteekateekaho ki, ebi abandi bantu bagamba. Mukama, reka okwera kwaitu . . . ebigaaniiro byaitu bibe ebirikwera. Reka bishemezibwe n'Ekigambo kya Ruhanga; bishemezibwe bityo, Mukama, kugira ngu hatagira obugobya obwashangwa omuriitwe. Obwo turiyo nitweshengyereza, omu nshobi zaitu, ngu Eshagama ya Yesu Kristo eyemerere ahagati yaitu na Ruhanga, kugira ngu Atureebe kurabira omu Shagama ya Yesu; kiteegamiire okuhikiirira kwaitu, nari eki turi, eki twakozire, kureka aha kubaasa Kwe kwonka. Ruhanga, kitukorere!

90 Ninshaba ngu hatagira omuntu n'omwe oshutami aha ekiro eki kandi akahurira Obutumwa, ninshaba ngu hatagira n'omwe omuribo owaabura, kuruga aha mwana orikukirayo obuto kuhika aha muntu orikukirayo obukuru. K'ekyetengo kyabo ekirikwera kibe ahari Ruhanga wenka n'Ekigambo Kye. Titurikumanya obwire obu Yaakureebekyeramu, nari eshaaha ei Yaakutweteramu kubuuzibwa okwo aha kucwerwa Orubanja. Titurikumanya eshaaha ei Arikubaasa kutweta, nk'oku kiri, kwiha fairo yaitu omu materekero, akagira ati, "N'obwire bw'okutaaha. Nooteekwa kugyenda." Ruhanga, tuhwere kuguma tushemeire. Kitukorere, Mukama.

Nkaabaasibwa ki tugumaho okuhitsya aha Kwija kwa Mukama, ku kiraabe nikibaasika. Nkaabaasibwa ki tukora buri kintu ekiri omu bushoborozi bwaitu, na rukundo n'okwetegyereza, kwetegyereza ngu Ruhanga naaronda omu nsi, ebiro ebi, naasherura buri ntaama eyaabuzire. Ka tugambe nabo n'okushaba okushemeziibwe rukundo n'Ekigambo kya Ruhanga, kugira ngu tubaase kubona emwe egyo ey'aha muheru, nikwo tubaase kutaaha Omuka, kandi turugye omuri Edeni egi eya ira ya Sitaane hanu, Mukama.

91 Ebyo byona ebyombekirwe aha kurigira okubi, n'abakazi barungi, nk'oku barikubeeta omu nsi, n'okurangirira kwabo aho bat, "Niturangirira, kandi nitwenda aboojo kwija beesiigire amajuta aha maisho gaabo, n'abaishiki barungi bajware ebijwaro bigufu munonga," ahari rediyo zaitu na televijoni; n'emiringo yoona y'oburofa n'ebeyondo, na Hollywood; n'ebijwaro by'abakazi by'obwa maraaya ebitashemeire, bibi, by'emiringo yoona. Kandi-kandi n'abashaija nibakikamisibwa kandi bajwara ebijwaro by'abakazi, kandi bashara amashokyga gaabo nk'abakazi; kandi n'abakazi nk'abashaija.

Ai Ruhanga, ka n'eshaaha erikutiinisa ei tutwiremu! Oo, ija, Mukama Yesu, ija! Ija, Mukama! Tushemeze n'eshagama. Iha oburofa bwona n'obugobya omuriitwe. Ka tutuure, Mukama, ka tutuure ahansi y'Eshagama, obwire bwona, omu maisho Gaawe. N'ekyetengo ky'emitima yaitu, n'okweshengereza kwaitu kw'amazima.

92 Ruhanga omukundwa, aha kitu- . . . nari ezo, meeza ndaingwa, ekiro eki, ahu Engiri yaaheza kuteebwa. Mukama, hanu hariho ebitambaara n'ebiboho bikye ebirikuza aha barware n'abarikubonabonesibwa. Reka okushaba kw'okwikiriza, Mukama, kurugye omu mitima yaitu hati, omu maisho Gaawe. Reero, Mukama, ku haraabe hariho ekintu kyona ekitaschemeire omuriitwe, Mukama, twara ebya . . . tuhitsye aha kucwerwa orubanja hati; kandi nitushaba embabazi. Tushuuruurire eki turikukora kubi, Mukama, nikwo tubaase kushaba, tutware Eshagama kandi etuschemeze. Tambira abantu aba abarware kandi obakize, Taata, kyona eki kiraahikyeho, hoonahoona ahu baraaze. Ka kibe kityo, Taata.

93 Tuhe omuzimbwe gw'Okukuheereza, kandi Iwe wenka. Kituhe, Mukama.

Yebare oku waatambira abantu. N'omwojo muto w'Ow'eishe-emwekazi Shepherd n'Ow'eishe-emwe Shepherd, ou egaari ehutaize, ninshaba ngu hatagira akabi akaamwijaho; omwana muto ogwo obaire naavuga egaari ye, ninshaba ngu abe gye. Nitukusiima ahabw'okutambira abandi aba abu twashabira. "Kandi nitumanya ngu eki tushaba tukitunga, ahabw'okuba nitwesiga Ogwo owaaraganiise."

94 Tuhe embabazi Zaawe, Mukama, kandi otusaasire eby'okushiisha byaitu, twashaba omu Izina rya Yesu Kristo. Amiina.

Kandi torikubaasa kuhamya Ruhanga omu buryo bwa sayansa. Nooteekwa kumwakiira ahabw'okwikiriza, "Ahakuba omuntu weena orikwija ahari Ruhanga naateekwa kwikiriza ku ariho, kandi ku aha ebihembo abamusherura n'obweziriki."

Ai Ruhanga, tindikwenda kumanya ekintu kyona kureka Eshagama ya Yesu Kristo erikuunyozyaho ebibi. Tiinyine ekintu kyona eki ndikumanya kureka Yesu Kristo. Kandi nk'oku Paulo owa ira yaagambire, naanye nikwo ndikugamba ekiro eki nti, "Tiinyine ekintu kyona eki ndikumanya omuriimwe, kureka Yesu Kristo, kandi Ogwo owaabambirwe."

95 Ekyo nikyo kyonka eki ndikumanya eky'okubagambira. Ngu, Baiburi egi, niinyikiriza n'omutima gwangye gwona (ku ndaabe nimmanya omutima gwangye) ngu n'Ekigambo ekihikire kya Ruhanga ekitafungwire. Ahabw'Egi nimbaho. Ahabw'Egi niinyemerera. Kandi kuri nyine amagara omutwaro, nkaayenzire ngu mpeyo buri kacweka kaago ahabw'Ekigambo eki, ahabw'okuba n'Ekigambo kya Yesu Kristo. Kandi tindikufayo n'obu baakugyezaho Kukihakanisa munonga bata, n'obu sayansa erikugyezaho munonga kugira ngu Tikirkwesigwa, n'ebindi. Ahariinye, nikyo kintu kyonka omu nsi eki ndikubaasa kwesiga, n'Ekigambo eki. N'owangye. Niimukunda. Timurikumukunda? [Abateeraine baagira bati, "Amiina." -Omur.]

96 Omu mutima gwawe ku haraabe harimu ekibi, ku haraabe harimu enshobe omu mutima gwawe, ku oraabe oine ekintu kyona, shaba hati kandi oshabe Ruhanga akusaasire. Munshabire; naanye ninza kubashabira. Ruhanga abahe omugisha, nikwo kushaba kwangye.

Okuhitsya obu turibugana! okuhitsya obu turibugana!

Ruhanga agume naimwe okuhitsya obu turigaruka kubugana!

Nimukundana? [Abateeraine baagira bati, "Amiina." -Omur.] Yohaana akagira ati, "Imwe abaana bato, mukundane." "Mukundane, ahabw'okuba okukunda kushweka ebibi bingi." Hati reka tukwatane omu ngaro.

Ruhanga abe naimwe okuhitsya obu turigaruka kubugana! Okuhitsya obu turibugana! okuhitsya obu turibugana!

Hati mugirirane esaasi. Mugirire esaasi buri omwe. Twaza mutaahi waawe kurungi. Yerinde ogume otaine ibara okuhitsya obu Yesu ariija.

... ebogyere;

Okuhitsya obu turibugana! okuhitsya obu turibugana!

Ruhanga agume naimwe okuhitsya obu turigaruka kubugana!

97 Nimumukunda? [Abateeraine baagira bati, "Amiina." -Omur.] Okwo nikwo kushaba kwangye. Munshabire; naanye ninza kubashabira. Nshemereire kugaruka Tucson hati. Kandi ni-ninshaba ngu Ruhanga abahe omugisha mwena. Okuruga okwo ninza Canada, kandi ngarukye Colorado; okwetooroora, oku, n'oku, mwareeba. Okuhitsya . . ? . .

Ow'eishe-emwe Tony ari okwo, kandi ekintu kikuru kibaireho. Ahansi ya Vatican honyini, omuri Rooma, nibashaba okusisiimuka, oruteerano, kugira ngu nzeyo reero ngireyo okusisiimuka omuri Rooma, omuri Rooma. Nibwo agarukire juba. Abantu boona bari hamwe. Baineyo ekishaaha kihango, ekirikushutamisa enkumi n'enkumi, kandi nibenda ngu nzeyo ahabw'okusisiimuka. Nibenda kureeba ekitiinisa kya Mukama omu buheereza. Tindikumanya. Ninteeekwa kukishabira, kureeba eki Mukama arangambire. Oo, mugyenzi! Mwijukye, mushabe, twena hamwe. Nitukora . . .

Tutegyereize okwija kw'Omujuni waitu ohairwe omugisha,

Reeba, kandi reeba amababi g'omutiini nigabengyea;

Engiri y'Obukama Bwe ebugire amahanga goona;

Kandi turi haihi n'emperu, neebaasa kureebwa.

Ekyo kihikire? [Abateeraine baagira bati, "Amiina." -Omur.]

Reero n'okushemererwa ka turangye Obutumwa bw'okureebeka Kwe okuhairwe omugisha,

Naija juba omu kitiiinisa, kugambira buri omwe;

Mbwenu musisiimukye, imwe abarikwera ba Mukama, ahabw'enki nimugwejegyera kunu emperu ehikire haihi,

Ka tweteekateekye ahabw'okweta okwo okw'aha muheru.

98 Naija kuhindukira burengyerwa-izooba kandi agarukye ogundi murundi, kimwe omu biro ebi, mwijukye. Buzima naaza kukikora. Kandi ekyo kihikire. Okuhitsya obwo:

Twara Eiziina rya Yesu,

Mwana w'obujune n'enaku;

Nirija kukuha okushemererwa kandi rikuhuumuze,

Ritware hoona ahi oraaze.

Eiziina ry'omuhendo (Eziina ry'omuhendo), O, ka nirirungi!

Matsiko g'ensi kandi okushemererwa kw'Eiguru;

Eiziina ry'omuhendo, O, ka nirirungi! (O, ka nirirungi!)

Matsiko g'ensi kandi okushemererwa kw'Eiguru.

Nitwinamira Eiziina rya Yesu,

Nitugwa turambiire aha bigyere Bye,

Omugabe w'abagabe omu Iguru nitwija kumujweka ekirunga,

Orugyendo rwaitu ku rurihwa.

Eiziina ry'omuhendo, O ka nirirungi!

Matsiko g'ensi kandi okushemererwa kw'Eiguru;

Eiziina ry'omuhendo, O ka nirirungi!

Matsiko g'ensi kandi okushemererwa kw'Eiguru

99 Hati, aha mushororongo ogu ogw'aha muheru, reka tugweshongore n'emitima einami hati.

Twara Eiziina rya Yesu,

Nk'engabo okukukingira buri mutego;

Kandi ebigyezo ku biraakwetooroore, (ebintu ebi eby'obukama bwa Sitaane, mwareeba, mwareeba)

Itsya kwonka eryo Eiziina erirkwera omu kushaba.

Nikyo ekkyo kyonka; reero oyegyendere. Nikikora. Nkakigyezaho. Kiikirize kwonka hati, 'habw'okuba nikiza kukora. Itsya kwonka Eiziina Rye erirkwera omu kushaba.

. . . Eiziina rya Yesu,

Nk'engabo kukukingira buri mutego;

Ebigyezo ku biraakwetooroore, (Obwo nookora ki?)

Itsya kwonka Eiziina eryo erirkwera omu kushaba. (Obwo ekyetwekyerero nikiza kwija aha maisho gaawe.)

Eiziina ry'omuhendo (Eziina ry'omuhendo), O ka nirirungi!

Matsiko g'ensi kandi okushemererwa kw'Eiguru;

Eiziina ry'omuhendo, O ka nirirungi!

Matsiko g'ensi kandi okushemererwa kw'Eiguru.

Reka twinikye emitwe yaitu hati, obwo ndiyo ninshaba Ow'eishe-emwe Beeler enyima okwo kwija hanu aha kituuti. [Ow'eishe-emwe Branham yaatandika kweshongora abumbire eminwa Twara Eiziina Rya Yesu -Omur.]

Itsya kwonka Eiziina Rye erirkwera omu kushaba.

Tusiibuure, Ow'eishe-emwe Beeler. Tusiibuure n'eshaara.

Eiziina ry'omuhendo,

Matsiko g'ensi kandi okushemererwa kw'Eiguru;

Eiziina ry'omuhendo (Eziina ry'omuhendo), O ka nirirungi!

Matsiko g'ensi kandi okushemererwa kw'Eiguru.

100 Hati twinikire emitwe yaitu, n'emitima yaitu einami. Ow'eishe-emwe Beeler, omwe aha barikukwatanisa naitwe hanu, Ow'eishe-emwe Estle Beeler, ow'eishe-emwe Omukristaayo murungi, omushaija omwesigwa. Naaza kumushaba ku araabe naabaasa kusiibuuraabantu, ekiro eki, n'eshaara. Ruhangaakuhe omugisha, Ow'eishe-emwe Beeler.



www.messagehub.info

Obutumwa obu bukabuurirwa
William Marrion Branham
“... omu biro by'eiraka ...” Kush 10:7